

卷三十五

天地水三官 東岳天齊 泰山治鬼 城陽王疎陵尉 伍子胥神 項羽神
衡岳借兵 閔壯繆 漢壽亭侯 天妃 金龍大王 祠山神 文昌神
灌口神 張仙 鍾馗 王靈官 城隍神 韓昌黎為土地神 五聖祠
晏公廟 常州忠佑廟 常州忠義祠

卷三十六

至尊 寡人 稱孤 公 卿 君侯 世父母 大公 繼室側室之誤
嫡姪 夫兄稱伯 夫弟稱小郎 如夫之妻稱妻下妻少妻庶妻
夫子 門生 門子 真人道士 居士 徵君徵士 野老

卷三十七

博士 待詔 大夫 郎中 大人 顯考 孤哀子 下官 小生 晚生 老先生
官人 官 爺 爹 家祖家父家君家兄家弟家姑家嫂 堂兄弟
尊老 尊兄 公弟 丈人 舅 內兄弟 親家翁 郎君 大相公 哥



15
1226
5



門 45
號 1226
卷 5

該餘叢考卷三十五

其文藝之類其十而一陽湖趙翼水耘菘



道家有所謂天地水三官者歸震川集有三官廟記云其說出於道家以天地水為三元能為人賜福赦罪解厄皆以帝君尊稱焉或又以為始皆生人而兄弟同產如漢茅盈之類也是震川初未嘗考其由來郎瑛亦但謂天氣主生木為生候地氣主成金為成候水氣主化水為化候其用司于三界而以三時首月候之故曰三元三元正當三臨官故又曰三官則瑛亦未究其出自何處按通志有三元醮儀一卷但不題撰人姓氏宣和

畫譜有名畫周昉三官像圖及唐末范瓊孫位張素卿
皆有之又東坡集中有水官詩乃大覺璉師以唐闡立
本所畫水官贈老泉老泉作詩報之兼命坡公屬和者
然老泉詩徒摹寫闡畫東坡亦第述立本之以畫名家
而未著水官所自惟宋景濂跋揭文安侯斯所撰曲阿
三官祠記謂漢熹平間漢中張修爲太平道張魯爲五
斗米道其法略同而魯爲尤甚自其祖陵父衡造符書
于蜀之鶴鳴山制鬼卒祭酒等號分領部衆有疾者令
其自首書名氏及服罪之意作三通其一上天著山
上其一葬之地其一沉之水謂之天地水三官三官之
名寔始于此云云此最爲得寔但裴松之三國志注引

典略謂爲太平道者乃張角爲五斗米道者乃張修後
漢書及司馬通鑑亦同景濂乃謂修爲太平道魯爲五
斗米道不免小說按松之所謂張修應是張衡卽張魯
父也典略誤耳然張衡等但有三官之稱而尚未謂之
三元其以正月七月十月之望爲三元日則自元魏始
魏書孝文帝以太皇太后喪詔令長至三元絕告慶之
禮是三元之名魏已有之蓋其時方尊信道士寇謙之
三元之說蓋卽謙之等襲取張衡三官之說而配以三
首月爲之節候耳冊府元龜唐開元二十二年十月勅
日道家三元誠有科戒今月十四日十五日是下元齋
日都內人應有屠殺令河南尹李適之勾當總與贖取

並令百姓是日停宰殺漁獵等自今以後兩都及天下諸州每年正月七月十月三元日起十三至十五兼宜禁斷舊唐書武宗紀會昌四年正月勅三元日各斷屠三日宋史方伎傳苗守信精道術書上言三元日上元天官中元地官下元水官各主錄人之善惡皆不可以斷極刑事下有司議行此又三元之名之原委也

東嶽天齊

舊唐書明皇封禪泰山加號天齊宋史大中祥符元年封禪畢詔加號泰山爲仁聖天齊王五年又加天齊仁聖帝元至元十八年詔加天齊大生仁聖帝天齊之名蓋本史記封禪書齊所以爲齊當天齊也故假借用之

以爲峻極于天之意然封禪書入神祠一曰天主祠天齊居臨淄南郊二曰地主祠泰山梁父則泰山與天齊各爲一祠本不相涉况天齊云者謂當天之中如天之臍也今乃不顧其本義但取其字之可通而剽剝附會之蓋出于張說之舞文也

泰山治鬼

東嶽主發生乃世間相傳多治死者宜胡應麟之疑也然亦有所本老學菴筆記謂楊文公遊岱之魂一句出河東記韋齊休事然駱賓王代父老請封禪文云就木殘魂遊岱宗而載躍又在河東前矣是放翁以駱文爲最先也其實後漢時已有此語後漢書烏桓傳其俗謂

人死則神遊亦山如中國人死者魂歸岱山也又許曼
傳曼少嘗疾病乃謁太山請命于寶搜神記胡母班死
往見泰山府君為之致書於河伯此事亦見三國志註三國志管輅
傳輅謂其弟曰但恐至泰山治鬼不得治生人劉楨贈
五官中郎將詩云常恐遊岱宗不復見故人應璩百一
詩云年命在桑榆東嶽與我期裴松之註三國引列異
傳蔣濟子既死夢于其母曰兒今為泰山伍伯甚苦有
謚士孫阿將死為泰山令乞豫屬之母以告濟濟往托
焉未幾阿果死月餘濟夢兒來言阿為令使兒得轉錄
事矣博物志泰山天帝孫也主召人魂東方萬物始故
知人生命古樂府齊度遊四方各繫泰山錄人間樂未

央忽然歸東岳是泰山治鬼之說漢魏間已盛行此又

駱文所本而放翁未引之何也

顧寧人云哀平之際識緯書出有遁甲開山圖云泰山在左元父在

在元父知生梁父知死云云謂泰山治鬼之說蓋起於西漢末

又王僧孺致何炯書亦有還魂斗

極追氣泰山之語南史沈攸之傳沈僧昭少事天師能
記人吉凶自云為泰山錄事幽司中有所收錄必僧昭
署名北史段暉傳有童子與暉同學二年將去謂暉曰
吾泰山府君子奉敕游學今將歸言終騰虛而去此又
皆唐以前泰山故事也宋稗記崔公誼補莫州任邱簿
會地震公誼任滿已孥家兩行夜宿忽有人叩戶云崔
主簿係合地動壓殺人已收魂到岱到家宜速崔自度
必死乃送其孥歸壽陽明日遂卒夷堅志孫默石倪徐

楷相繼爲泰山府君又呂辨老得一印文曰泰山府君之印王太守借觀之未幾王死王素有善政人以為必主岱岳也張廿三旣死子幼贅壻陳昉主其家事而斃其子已而張同一黃衣者向陳索命顧黃衣者使執之黃衣曰須先于泰山府君處下狀滕廸功妻趙氏殺其妾陳馨奴未幾趙死而失其首方捕治而陳現形提其頭出示人曰我已訴岳帝得報此讐恐于連無辜故來明此事然則泰山治鬼世果有其事也

城陽王秣陵尉

顧寧人謂六朝以前多祀城陽景王劉章及蔣子文之祀最盛按後漢書樊崇起兵軍中有巫鼓舞祠城陽景

王巫言景王大怒曰當作縣官何故作賊笑巫者輒病于是乃立劉盆子爲帝又魏書城陽景王卽漢朱虛侯章以其有功于漢故其國爲立祠青州諸郡轉相倣倣濟南尤盛或假二千石輿服導從作倡樂曹掾爲濟南相始禁之是城陽之祀于北方顯赫可知通鑑集覽蔣子文漢末秣陵尉逐賊至鍾山傷額而死吳先主時其故吏遇之于途子文曰我當爲此土地神又附巫語當大啟孫氏吳主乃爲立廟封中都侯晉書載記苻堅入寇會稽王道子以威儀求助于鍾山蔣侯封以相國之號南史宋太子劭之逆南譙王義宣起兵至新亭劭以輦迎蔣侯于宮內拜大司馬封鍾山郡王使南平王鑠

造策文又宋書禮志明帝加蔣侯爵位至相國大都督中外諸軍事齊書東昏侯信蔣侯神迎入宮晝夜祈禱左右朱光尚云見神動輒啟並云降福始安之平遂加位相國後又號爲靈帝車服羽儀一如王者設鎧馬甲仗千人皆張弓拔白出東掖門云蔣侯出盪梁書曹景宗傳武帝因祈雨不應欲焚蔣帝廟俄而雨注帝遂到廟修謁陳書武帝卽位幸鍾山祀蔣帝廟又永定三年久不雨帝幸鍾山祭蔣帝廟是日遂雨此蔣廟之顯赫于鍾山者也南史梁武起兵圍郢城時城中張元嗣等迎蔣侯于州廳祈福鈴鐸晝夜不絕使導從登陴魏軍圍鍾離城中乞蔣帝扶助神報許旣而無雨水頓

長遂挫敵後見廟中人馬脚盡濕此蔣廟之遍于州郡者也後魏任城王爲揚州刺史毀蔣子文之廟可見揚州亦有此廟寧人所謂六朝以來多祀此二神信不妄也然六朝時尚有伍子胥項羽二神亦香火最盛項羽神之祀寧人已敘及亦尚未備今更廣錄並伍子胥之祀亦著于後

無有能知其姓名者矣

按蔣廟明初鷄鳴山十廟中尚存其一永樂七年正月又進封爲忠烈武順昭靈嘉佑王然民間已無祀之者城陽景王則併

伍子胥神

史記伍子胥死吳人憐之爲立祠于江上命曰胥山此子胥之祀之始也王充論衡吳王殺子胥煮之于蘄乃以鴟夷橐投之江子胥恚恨驅水爲濤以溺人故會稽

丹徒大江錢塘浙江皆立其祠後漢書張禹爲揚州刺史當過江行部吏白江有伍子胥神當祀之此兩漢之祀伍廟也吳志孫綝悔慢明神遂燒大橋頭伍子胥廟燒伍廟而世俗謂之慢神則其時廟祀之顯赫可知隋書高勣爲楚州刺史城北有伍子胥廟其俗敬神祈者必以牛酒至破產業勣乃嚴爲禁止則六朝以後伍廟顯赫又可知唐書狄仁傑使江南毀淫祠千七百所惟夏禹吳泰伯季札伍員四祠不廢今按六朝以前所祀之神俱已湮沒而子胥廟唐以後尚多崇祀豈以梁公所未毀遂得留耶抑神之靈尚不泯耶北夢瑣言閩王審知患海中石碣爲舟楫害夢吳安王卽子胥許爲開導

乃遣劉山甫祭奠甫畢忽風雷勃興海中有黃物長千百丈奮躍攻擊三日旣霽則石港已通暢乃名之曰甘棠港宋史馬亮知杭州會江濤大溢亮禱伍員祠明日潮却出橫沙數里是伍相之神久而益顯也元史大德三年又加封忠孝威惠顯聖王

項羽神

顧寧人日知錄謂六朝時吳興項羽神最爲顯赫而引宋書孔季恭傳先是吳興頻喪太守云項羽神爲卞山王居郡廳事二千石至常避之又南齊書李安民傳太守到郡必祀以輓下午安民奉佛法不與神牛著屐上廳事又于廳上設八關齋俄而牛死安民亦卒云云以

爲當時憤王之威靈如此然不止此二事也南史蕭思話傳吳興下山有項羽廟土人名爲憤王宮相承云羽多居郡廳事遂于廳事安牀幕爲神座前後二千石皆于廳拜祠以輓下牛而避居他室及蕭惠明蒞任日孔季恭嘗爲此郡而未聞有災遂設筵榻接賓數日見一人長丈餘張弓挾矢相向旣而不見因發背旬日而卒蕭惠休從吳興太守徵爲僕射人謂惠休事項羽神甚謹故得美遷蕭猷爲吳興太守與項羽神交懽恒飲至一斛神亦有酒色有禱必驗後爲益州刺史值齊狗兒亂來攻城猷乃遙祝請救有田夫道逢數百騎至問爲誰曰吳興楚王來救是日遂破賊合此數事觀之憤王

之盛行于六朝益可信矣惟蕭琛至郡著屐登廳事聞室中有叱咤聲琛厲色曰生不能與漢祖爭中原死據此廳何也因遷之于廟後竟無他則神亦有時因人而屈然陳武帝永定二年至遣中書舍人韋鼎册之爲帝其顯赫可想也按張鷟耳日記垂拱四年安撫大使狄仁傑檄告楚霸王項君將校等畧曰鴻名不可以繆假神器不可以力爭云云檄到如律令遂除項羽廟及餘神並盡惟會稽禹廟在焉亦見沈俶諧史又封氏聞見記亦謂狄公檄書責其喪失八千子弟而妄受牲牢之薦然則項羽神唐初猶盛其以狄梁公檄除之後遂漸衰替耶然梁溪漫志和州烏江縣英惠廟卽項羽神靈

響昭著紹興辛巳敵犯淮南過廟入禱擲珓數十皆不吉欲火焚其廟俄有大虺見于神座敵駭而出移屯東去郡上其事于朝詔封爲靈祐王邦人益嚴事之則宋南渡時亦尚著靈異也

衡嶽借兵

癸辛雜志有衡嶽借兵一條衡嶽之廟四門皆有侍郎神惟北門主兵朝廷每有兵事則前期差官致祭然其門亦不敢全開以尺寸計兵數或云其主司乃張子亮也張爲湘南運判死于官丁卯戊辰間南北交兵朝廷降香神許啟門三寸臬使遂全門大啟旋以捷告而廟旁數里居民皆被風災最後有聲若雷居民喜曰神歸在矣

關壯繆

鬼神之享血食其盛衰久暫亦若有運數而不可意料者凡人之歿而爲神大概初歿之數百年則靈著顯赫久則漸替獨關壯繆在三國六朝唐宋皆未有禋祀考之史志宋徽宗始封爲忠惠公大觀二年加封武安王高宗建炎二年加壯繆武安王孝宗淳熙十四年加英

濟王祭於荆門當陽縣之廟

獨醒志李若水初為大名府元城尉有村民持一書來云夢金甲神人告我到

關大王廟側遇鐵冠道士以其書下李縣尉夷堅志明

橋都統自立生祠於關王廟側是宋時關王廟亦已多元文宗天歷元年

加封顯靈威勇武安英濟王

元史世祖尊崇佛教用漢關壯繆為監壇

明洪武中復

侯原封萬歷二十二年因道士張通元之請進爵為帝

廟曰英烈四十二年又勅封三界伏魔大帝神威遠鎮

天尊關聖帝君又封夫人為九靈懿德武肅英皇后子

平為竭忠王與為顯忠王周倉為威靈惠勇公賜以左

丞相一員為宋陸秀夫右丞相一員為張世傑其道壇

之三界馘魔元帥則以宋岳飛代其佛寺伽藍則以唐

尉遲恭代劉若愚燕史云太監林朝所請也繼又崇為

武廟與孔廟並祀 本朝順治九年加封忠義神武關

聖大帝今且南極嶺表北極塞垣凡兒童婦女無有不

震其威靈者香火之盛將與天地同不朽何其寂寥於

前而顯燦於後豈鬼神之衰旺亦有數耶

夷堅志涪江張桓侯廟紹興初張魏

公宣撫蜀中有死卒更生傳神語欲助順未幾金婁室兀术連犯漢中皆敗去魏公承制追封忠顯王則張桓侯之王封亦自宋始

又按宋牧仲筠廊偶筆載馮景所記解州斷碑一事

謂壯繆生辰世皆以為五月十三日不知乃其子平

生日也康熙十七年解州常平村人于昌者讀書塔

廟廟壯繆故居也晝夢壯繆授以易碑二字驚悟適

見濬井者得巨碑數段昌合而讀之乃記壯繆之祖

考諱字生卒遂奔告州守王朱旦朱旦因據碑作記

侯祖石磐公諱審字問之和帝永光二年庚寅生居

解州常平村寶池里卒于桓帝永壽三年丁酉享年六十八子諱毅字道遠桓帝三年庚子六月二十四日生侯侯長娶胡氏靈帝光和元年戊午五月十三日生子平云云然則侯之生以六月二十四日也亦見吳青壇讀書質疑按東漢人尚無別號今既名審字問之則石磐乃別號一可疑也名審則字問之名毅則字道遠皆取論語中庸之文其時中庸雜在禮記中何以兩代名字恰用中庸論語二書二可疑也壯繆尚有子曰興碑既載其兄何不載其弟三可疑也壯繆歿後子孫在蜀解州故鄉尚屬魏晉此碑何時何人所立並不附見四可疑也馮景所記其信然

耶否耶姑存之以備一說

漢壽亭侯

關壯繆斬顏良曹搆表爲漢壽亭侯見三國志先主卽位時勸進表列名漢壽亭侯關羽新亭侯張飛更可証也宋書王鎮惡以平劉毅功封漢壽縣子沈林子亦封漢壽縣伯南史蔡道恭梁天監中封漢壽縣伯又劉悛以漢壽人邵榮典六世同居特表其門是漢壽本地名後人誤以漢字屬上但稱壽亭是以洪容齋隨筆力辨其非王敬哉冬夜箋記亦謂漢壽二字不宜拆用吳青壇讀書質疑并稱漢壽縣在犍爲史稱費禕被害于漢壽是也然青壇亦未詳考按漢壽縣本有二費禕被害

之地在蜀中郭璞爾雅註云有水從漢中沔陽縣南流
至梓潼漢壽此本廣漢葭萌縣建安二十五年蜀先主
改名漢壽者今為四川保寧府廣元縣曹操表封關公則在建安五年
固無由預立此名續漢郡國志武陵屬縣有漢壽乃漢
順帝時改名關公所封蓋卽此地三國吳志有潘濬武
陵漢壽人晉書有潘京亦武陵漢壽人是武陵之有漢
壽明甚而熊方後漢書年表異姓侯內有壽亭侯關羽
其下格註云武陵此尤關公所封漢壽在武陵之明証
也壽亭上少一漢字蓋傳寫脫悞惟劉禹錫有漢壽亭春望詩自注在荊州
刺史治名勝志亦云荊州有漢壽城是曹操表封關羽
處則似荊州又有一漢壽按漢末武陵郡亦荊州所屬

然刺史治所則不在此此蓋後人因關公會鎮荊州而
建城築亭以誌遺蹟耳至世之稱壽亭則已非一日大

明會典亦止稱壽亭侯

明初鷄鳴山建廟止稱壽亭侯嘉靖十年太常卿黃芳奏改稱漢前將軍漢壽亭侯

宋

牧仲筠廊偶筆記大內有壽亭侯印九紐連環四翡翠
爛然傍有痕似嵌寶石取去者牧仲之父文康公嘗印
取一紙云又許觀東齋記事紹興中洞庭漁人獲一印
方僅二寸製甚古紐有連環四兩兩相貫上有一大環
總之漁者以爲金競而訟于官辨其文乃壽亭侯印四
字遂留長沙官庫庫吏見印上時有光怪白于官乃送
荆門玉泉寺關壯繆祠淳熙四年玉泉祠僧真慈將獻
之東宮忽光焰四起衆皆驚遂不復獻云亦見司馬知白所作關侯印記按

紹興時所獲古印已但稱壽亭侯則知世俗之訛公本號已久矣乃本號已訛而神靈猶式憑之展轉示異一若不妨委曲遷就而終不能忘情於此者何也

按後漢書異姓侯有

壽亭侯關羽似關公初封即曰壽亭侯然蜀志明言曹操表封羽為漢壽亭侯後漢表蓋傳寫脫誤

天妃

江漢間擦舟者率奉天妃而海上尤甚張燮東西洋考云天妃莆之湄洲嶼人五代時閩都巡檢林願之第六女生于晉天福八年宋雍熙四年二月二十九日化去後嘗衣朱衣往來海上里人虔祀之宣和癸卯給事中

路允迪使高麗中流遇風他舟皆溺神獨集路舟得免還奏特賜廟號曰順濟紹興乙卯海寇至神駕風一掃而遁封昭應崇福乾道己丑加封善利淳熙間加封靈惠慶元開禧景定間累封助順顯衛英烈協正集慶等號又夷堅志興化軍海口林夫人廟靈異甚著今進為妃云則在宋時已封為妃也元史祭祀志南海女神靈惠夫人至元中以護海運有奇應加封天妃神號積至十字廟曰靈慈祝文云年月日皇帝遣某官致祭于護國庇民廣濟福惠明著天妃又續通考云至元十五年封泉州神女護國明著靈惠協正善慶顯濟天妃二十五年加封廣佑明著天妃七修類藁亦謂至元中顯靈于海有海運萬戶馬合法忽魯循等奏立廟號天妃順帝又加輔國護聖庇民廣濟福惠明著天妃是天妃之

名自有元始何喬遠閩書載妃生卒與張燮同又謂生時卽能乘席渡海人呼爲龍女昇化後名其墩曰聖墩立祠祀之洪武五年又以護海運有功封孝順純正孚濟感應聖妃則又有聖妃之稱七修類藁則云封昭應德正靈應孚濟聖妃通考永樂中建天妃廟賜名宏仁普濟天妃宮有御製碑正月十五三月二十三日遣太常寺致祭故今江湖間俱稱天妃天津之廟并稱天后宮相傳大海中當風浪危急時號呼求救往往有紅燈或神鳥來輒得免皆妃之靈也竊意神之功效如此豈林氏一女子所能蓋水爲陰類其象維女地媪配天則曰后水陰次之則曰妃天妃之名卽謂水神之本號可

林氏女之說不必泥也張學禮使琉球記又云天妃姓蔡閩海中梅花所人爲父投海身死後封天妃則又與張燮何喬遠所記不同矣

成化間給事中陳詢奉命往日本至大洋風雨作將覆舟有二紅燈自天而下遂得泊于島若有人告曰吾輩爲天妃所遣也又嘉靖中給事中陳侃奉使封琉球遇風將覆舉舡大呼天妃亦見火光燭船船卽少寧明日有粉蝶飛繞舟不去黃雀立柁樓食米頃刻風起舟行如飛曉至閩午入浙之定海俱見七修類稿吾鄉陸廣霖進士云臺灣往來神跡尤著土人呼神爲媽祖倘遇風浪危急呼媽祖則神披髮而來其效立應

若呼天妃則神必冠帔而至恐稽時刻媽祖云者蓋
閩人在母家之稱也

金龍大王

江淮一帶至潞河無不有金龍大王廟按湧幢小品神
姓謝名緒南宋人元兵方盛神以戚晚憤不樂仕隱金
龍山築望雲亭自娛元兵入臨安赴江死尸僵不壞鄉
人瘞之祖廟側明祖兵起神示夢當佑助會傳友德與
元左丞李二戰呂梁洪士卒見空中有披甲者來助戰
元遂大潰永樂中鑿會通渠舟楫過河禱無不應于是
建祠洪上隆慶間潘季馴督漕河河塞不流為文責神
有書吏過洪遇鬼伯擒以見神神詰之曰若官人何得

無禮河流塞亦天數也為我傳語司空吾已得請河將
以某日通矣已而果驗于是季馴事之甚謹施愚山獲
齋雜記亦載之然則神之祀始于永樂中而隆慶以後

乃益盛歟

本朝順治二年十二月封黃河神為顯祐通濟金龍四大王之神運河神為延休顯應分水龍王之神

祠山神

俗祀祠山神稱為祠山張大帝王弇州宛委餘編引西
陽雜俎天帝劉翁者惡張翁欲殺之張翁具酒醉劉翁
而乘龍上天代其位亦見諸稟記及殷芸小說周興死天帝召
興升殿興私問左右曰是古張天帝耶答曰古天帝已
仙去此是曹明帝耳云云以為張大帝之證此特因一
張字偶合故引之以寔其說殊不知西陽雜俎及殷芸

小說固荒幻不經卽其所謂張天帝者亦指昊天上帝言之而于祠山無涉也世俗荒怪之說固無足深考然其訛謬相仍亦必有所由始按程棨三柳軒雜識廣德祠山神姓張避食豨而引祠山事要云王始自長興縣疏聖瀆欲通津廣德化身爲豨縱使陰兵爲夫人李氏所覘其工遂輟是以祀之避豨宋稗所載更詳謂其神姓張名燭爲程縣人役陰兵導河欲通廣德自長興縣疏鑿聖瀆先與夫人約每餉至鳴鼓三聲王卽自至不令夫人見之後夫人遺餐于鼓鴨啄鼓鳴王以爲餉至至則無有已而夫人至鳴鼓王反不至夫人遂親至河所見王爲大豕驅陰兵開濬王見夫人自慙工遂輟而

逃于縣西五里橫山之頂居人思之爲立廟夫人亦至縣東二里而化爲石人亦立廟歷漢唐以來廟祀不廢云詹仁澤曾樵又編輯廣德橫山神張王事蹟名祠山家世編年一卷大略相同癸辛雜識廣植守廣德日郡中祠山有埋藏會植不信用郡印印之其封明日發視無有焉此祠山神之見于小說者也文獻通考祠山神在廣德土人多以耕牛爲獻南唐時聽民租賃每一牛出絹一疋供本廟之費其後絹悉入官景德二年知軍崔憲請量給絹以葺廟宇上曰此載在祀典應官爲修葺宋史范師道傳廣德縣有張王廟民歲祀神殺牛數千師道至禁絕之黃震傳通判廣德軍舊有祠山廟民

禱祈者歲數十萬其牲皆用牛并有自嬰桎梏考掠以
激福者震皆杖禁之明史周瑛傳瑛守廣德禁祀祠山

閱文振仰山陞錄瑛著
祠山辨以息好鬼之俗

此祠山神之見于史志者也合而觀

之則祠山神之祀本起于廣德其所謂化豬通津蓋本
淮南子禹化為熊通轅轅之路塗山氏見之慚而化為
石之事移以附會于祠山然俗所傳祠山張大帝寔本
此而非如弇州所云也且祠山張大帝之稱乃近代流
俗所傳而宋以來尚稱張王並未加以帝號夷堅志華
亭胡亶家供事廣德張王甚虔其子婦慘妬杖妾甚酷
妾潛縊將死亶夢有神撼之起乃得解而救之蓋蒙神
佑云又昆陵胡瑤少年過廣德謁張王廟求夢夜夢人

大鰲字叩一吏問以窮通吏曰可至通直胡意殊不滿
已而竟以通直致仕陸放翁有張王行廟詩高翥菊磻
小集亦有詩為輦下酒行多祭二郎神及祠山神而作
者詩云簫鼓喧天闌酒行二郎賽罷賽張王愚民可煞
多忘本香火何曾到杜康元泰定帝加封曰普濟而王
號如故明史禮志祠山廣惠張王勦以二月十八日祭
則所謂張大帝者本流俗之稱安得以流俗所稱之帝
而擬之昊天上帝乎弇州所云殊為失考余自黔歸江
行以風水為命舟人為余歷數每日風報多驗其中有
所謂祠山報者云帝以二月八日下地為三女營嫁一
嫁風一嫁雪一嫁雨待食凍狗肉始上天蓋謂二月八

日以後必多風雨雪直至戌日乃止驗之果然然則俚俗誕妄之說固不足信而以之候晴雨驗災沴則有不爽者明祖雞鳴山十廟獨不廢此祀其亦有所驗歟

文昌神

今世文昌祠所祀梓潼帝君王弇州宛委餘編謂卽陷河神張惡子而引其所著化書謂本黃帝子名揮始造絃張羅網因以張爲氏周時爲山陰張氏子以醫術事周公卒托生于張無忌妻黃氏爲遺腹子詩所稱張仲孝友者也以直諫爲幽王所醜魂遊雪山治蜀有功五丁拔山蛇壓死蛇卽其所化也尋爲漢帝子曰趙王如意爲呂后所殺魂散無歸孝宣世至邛池其令曰呂牟

卽呂后之後身也母戚夫人亦生于戚嫁張翁老無子相與瀝血石曰中祝曰我無子倘得一動物亦遺體也自是感生爲蛇呂令有馬乃呂產後身蛇輒食之呂令怒繫張夫婦將殺之蛇遂揚海水作雨灌城邑皆陷今所謂陷河也以所殺多譴爲卬池龍受熱沙小虫之苦遇文殊皈誠脫罪復生于趙國張禹家名勲爲清河令卒又生爲張孝仲時順帝之永和間也西晉末復生于越雋張氏年七十三入石穴悟道而化改形入咸陽見姚萇後萇入蜀至梓潼嶺神謂之曰君還秦秦無主其在君乎請其氏曰張惡子也後萇卽其地立張相公廟唐僖宗幸蜀神又出迎帝解佩賜之還日賜遺無筭王

中令鐸有詩云夜雨龍拋三尺匣春雲鳳入九重城云云按陷河事亦見王氏見聞及窮神秘苑太平廣記諸書所載略同北夢瑣言亦謂梓潼張亞子乃五丁拔蛇之所也或又云雋州張生所養蛇托生爲僞蜀王建太子元膺有蛇眼竟以作逆誅誅之夕梓潼廟祝亟爲亞子所責言我在川今始歸何以致廟宇荒穢若此據此則所謂張惡子者乃流轉于人與蛇間一變幻不經之物耳不知與文昌二字何與又續通考云劍州梓潼神張亞子仕晉戰歿人爲立廟唐元宗西狩追封左丞僖宗入蜀封順濟王咸平中王均爲亂官軍進討忽有人登梯指賊大呼曰梓潼神遣我來九月二十日城陷爾

等悉當夷滅及期果克城招安使雷有終以聞改封英顯王號此見于祀典者然亦與文昌二字無涉也明史禮志宏治中尚書周洪謨等議祀典云梓潼帝君者記云神姓張名惡子居蜀七曲山仕晉戰歿人爲立廟唐宋屢封至英顯王道家謂帝命梓潼掌文昌府事及人間祿籍故元加號爲帝君而天下學校亦有祠祀者景泰中因京師舊廟闕而新之歲以二月三日生辰遣祭夫梓潼顯靈於蜀廟食其地爲宜文昌六星與之無涉宜勅罷又續通考嘉靖中倪文毅請正祀典疏亦本周洪謨之說謂梓潼神景泰五年始勅賜文昌宮今宜祀于蜀不宜立廟京師至文昌之星與梓潼無干乃合而

爲一誠出附會所有前項祀典伏乞罷免則亦謂梓潼之與文昌了不相涉也然世以梓潼爲文昌則由來已久按葉石林崖下放言記蜀有二舉人行至劍門張惡子廟夜宿各夢諸神預作來歲狀元賦甚靈異高文虎蓼花洲閒錄亦載此事然則張惡子之顯靈于科目蓋自宋始亦自宋之蜀地始朱子語類所謂梓潼與灌口二郎兩個神幾乎割據了兩川也世人因其于科目事有靈異元時遂以文昌帝君封之前明又以文昌額其宮而張惡子之爲文昌帝君遂至今矣明都印三餘贅筆則謂梓潼乃四川地四川上直參宿參有忠良孝謹之象其山水深厚爲神明所宅或又謂斗魁爲文昌六

府主賞功進爵故科名之十多事之此二說理雖較長然皆從文昌二字立說而于張惡子之所以稱文昌則毫無干涉也

蜀志秦必傳蜀有汶阜之山江出其腹帝以會昌神以建福河圖括地象曰岷山之地土爲井絡帝以會昌神以建福都印之

灌口神

夷堅志永康軍崇德廟乃灌口神祠爵封王置監廟官蜀人事之甚謹每時節獻享及因事有所者必宰羊一歲至四萬口一羊過城納稅錢五百歲終可得錢二萬千爲公家無窮利當神之生日郡人釀迎盡敬官僚亦無不瞻謁者按獨醒志灌口二郎神乃祠李冰父子也冰秦時守其地有龍爲孽冰鎖之于離堆之下故蜀人

德之每歲用羊至四萬餘凡買羊以祭偶產羔者亦不敢留永康藉羊稅以充郡計江鄉人今亦祠之每祭但一羊不設他物蓋有自也元至順元年封李冰爲聖德廣裕英惠王其子二郎神爲英烈昭惠靈顯仁祐王見元史本紀

張仙

世所稱張仙像張弓挾彈似貴游公子或曰卽張星之神也陸文裕金臺紀聞云後蜀主孟昶挾彈圖花蕊夫人攜入宋宮念其故主嘗懸于壁一日太祖詰之詭曰此蜀中張仙神也祀之能令人有子于是傳之人間遂爲祈子之祀云郎瑛七修類稿亦載此說又王弇州勘

書圖跋宋初降王惟孟昶具天人相見于花蕊夫人所供其童子爲元詰武士爲趙廷隱當時進御者以勝國故不敢具其寔乃目爲文皇耳據此則此像又有托之爲唐太宗者余謂此一說皆未必然昶之入汴也宋祖親見之花蕊果攜其像宋祖豈不能識別而敢以詭辭對至托爲唐文皇則更無謂按高青邱有謝海雪道人贈張仙像詩云余未有子海雪以此像見贈蓋蘇老泉嘗禱之而得二子者因賦詩以謝云道人念我書無傳畫圖卷贈成都仙云昔蘇夫子建之玉局禱甚虔乃生五色兩鳳鸞和鳴上下相聯翩然則此像本起于蜀中閨閣祈子久已成俗是以花蕊携以入宮後人以其來

自蜀道轉疑爲孟利像耳按蘇老泉集有張仙贊謂張名遠霄眉山五代時遊青城山成道陸放翁答宇文使君問張仙事詩自註云張四郎常挾彈視人家有灾者輒以鉄丸擊散之又贈宋道人詩云我來欲訪挾彈仙嗟哉一矢五百年續通考云張遠霄一日見老人持竹弓一鐵彈三來質錢三百十張無斲色老人曰吾彈能辟疫當寶用之後老人再來遂授以度世法熟視其目有兩瞳子越數十年遠霄往白鶴山遇石像名四目老翁乃大悟卽前老人也眉山有遠霄宅故址李石詩云野草閒花不計年亭亭雙檜欲參天讀書却得騎驢老賈藥來尋跨鶴仙是蜀中本有是仙今所畫張弓挾

彈乃正其生平事實特未知何以爲祈子之祀胡應麟又謂古來本有此張弓挾彈圖後人因附會以張弓爲張挾彈爲誕遂流傳爲祈子之祀此亦不加深考而爲是臆說也

按古者男子生懸弧矢又祀高禘之禮於所禱者帶以弓鞬授以

矢此本是祈子之事後人或緣此寫爲圖以爲祈子之神像遂

輾轉附會而實以姓名耳

鍾馗

顧寧人謂世所傳鍾馗乃終葵之訛其說本于楊用修郎仁寶二人仁寶七修類稿云宣和畫譜釋道門載六朝古碣得于墟墓間者上有鍾馗二字則非唐人可知北史魏堯暄本名鍾葵字辟邪意葵字傳訛而捉鬼之說起于此也用修丹鉛雜錄云唐人戲作鍾馗傳虛構

其事如毛穎陶泓之類也蓋因堯鍾葵字辟邪遂附會
畫鍾葵于門以為辟邪之具又宗慤妹名鍾葵後世因
又有鍾馗姊妹圖但葵馗二字異耳此事見沈括筆談皇祐中金陵發一塚有石誌乃宗慤母郭夫人宗慤有妹名鍾馗則禮考工記大圭終葵首注齊人謂椎曰終
葵圭首六寸為椎以下殺說文大圭長三尺杼上終葵
首謂為椎于杼上明無所屈也禮記玉藻天子搢珽注
亦同云云是用修之說較仁寶更詳則鍾馗由堯終葵
字辟邪之訛固屬有因而大圭之終葵何以轉為人名
之終葵則未見的義顧寧人乃引馬融廣成頌揮終葵
揚玉斧謂古人以椎逐鬼如大讎之執戈揚盾此說近
之蓋終葵本以逐鬼後世以其有辟邪之用遂取為人

名流傳既久則又忘其為辟邪之物而意其為逐鬼之
人乃附會為真有是食鬼之姓鍾名馗者耳胡應麟筆
叢朱國楨湧幢小品亦引堯終葵字辟邪以為鍾葵本
辟邪之物然俱不如寧人引馬融頌之融貫也至用修
謂唐人戲作鍾馗傳則不詳其載在何書今按天中記
引唐逸史明皇因疴疾晝臥夢一小鬼盜太真香囊及
上玉笛上叱問之奏曰臣乃虛耗也能耗人家喜事成
憂上怒欲呼武士俄見一大鬼破帽藍袍角帶朝靴捉
小鬼剝其目劈而啖之上問爾何人曰臣終南進士鍾
馗也武德中應舉不第觸堦而死得賜綠袍以葬感恩
發誓為帝除虛耗妖孽之事言訖夢覺而疾遂瘳乃詔

吳道子畫之道子沉思若有所覩成圖以進上視之曰
是卿與朕同夢也唐逸史不可見天中記所載斯其故
事矣亦見沈括筆談然此事不辨可知其妄也後魏北
齊及周隋間多有名鍾葵者魏獻文帝時則有枹罕鎮
將楊鍾葵又張袞之孫白澤本名鍾葵獻文改名白澤
于勁亦字鍾葵孝文時有頓邱王李鍾葵北齊武成時
有宦者宮鍾葵後主緯時有慕容鍾葵奔于周隋煬時
漢王諒反有大將喬鍾葵又隋宗室處綱之父名鍾葵
又魚俱羅與蜀將段鍾葵討平越雋蠻唐時王武俊有
將張鍾葵寇趙州爲康日知所殺古人名字往往有取
佛世尊鬼之類以爲名者張鍾葵無論若楊鍾葵等係

六朝人俱在唐前倘食鬼之鍾馗係唐武德中進士則
楊鍾葵等之命名何由逆知後世有是辟鬼之神而取
之也哉則天中記之說真附會也然唐時則鍾進士食
鬼之說盛行甚至朝廷之上每歲暮以鍾馗與歷日同
賜大臣此亦起于明皇
見沈括筆談劉禹錫有代杜相公謝賜鍾馗歷日
表云圖寫威神驅除羣厲頒行元歷敬授人時又代李
中丞謝表云繪其神像表去厲之方頒以歷書敬授時
之始至宋時猶然神宗于禁中得道子所畫鍾馗因鏤
板以賜二府然則訛謬相沿已非一日也又蘇易簡文
房四譜云虢州歲貢鍾馗二十枚用修亦以爲卽考工
記大圭終葵之義謂硯形銳其首如圭耳據此則硯之

銳者亦名鍾馗并不名終葵矣胡應麟非之以爲附會然鍾馗列于文房四譜則其爲硯之形製而非造爲神像可知至高江邨釋考工記注終葵謂蔓生之物葉圓而厚圭首之圓厚如之故以爲名此未免臆說顏之推曰北齊有一士讀書不過二三百卷嘗出境聘東萊王韓問玉珽杼上首終葵首當作何形荅曰珽頭曲圓勢如葵葉耳韓爲忍笑江村之云母乃類是要之但據考工記注槌曰終葵再以馬融所頌終葵逐鬼之物証之自可了然毋庸更多枝辭也

王靈官

道觀內多塑王靈官像如佛寺之塑伽藍作鎮山門也

孫國教燕都遊覽志謂永樂間有周思得者以王元帥法顯京師元帥者世稱靈官天將二十六居第一位文皇禱輒應乃命祀于宮城西宣德初拓之額曰大德顯靈宮按帝京景物略及列朝詩集文皇獲靈官藤像于東海朝夕禮之如賓客所征必載及金川河昇不可動就思得問之曰上帝界至此也果有榆川之役夫曰獲藤像于東海則古來已有是像非至永樂中始朔也而倪岳青溪漫稿述道家之言宋徽宗時有西蜀人薩守堅嘗從林靈素傳法而王靈官則玉樞火府天將又從守堅受符法者永樂中勅建天將廟宣德中改爲火德觀封薩爲崇恩真君王爲隆恩真君歲時遣官致祭然

則王元帥者特有宋方士之流林靈素已無他術况又從而輾轉受法者乃其威靈至今不泯世俗尊奉益盛何也宏治中周洪謨議及嘉靖中倪文毅請正祀典疏皆云道家之崇恩真君薩守堅嘗從林靈素傳道而隆恩真君則火府天將王靈官又從薩真君授法永樂中有杭州道士周思德以靈官之法顯于京師乃建天將廟及祖師殿宣德中改廟爲火德觀崇奉二真君成化中改觀曰宮加顯靈二字遞年四季換袍服三年一小焚化十年一大焚化再易以新製珠玉錦綉所費不貲每歲萬壽節正旦冬至及二真君示現之日皆遣官致祭其崇奉可謂至矣今就其議言之薩真人之法皆林靈素所傳一時傳會之說本無可信况近年附體降神者乃充軍顧珏顧倫之父子其爲鄙褻尤甚怪誕可知但經累朝創建難便廢毀所有前項祭祀俱應罷免其四時袍服宜令本宮住持依期更換如法收貯不必焚化永爲定例云

城隍神

王敬哉冬夜箋記謂城隍之名見于易所謂城復于隍也又引禮記天子大蜡八水庸居其七水則隍也庸則城也以爲祭城隍之始固已然未竟名之爲城隍也按北史慕容儼鎮郢城梁大都督侯瑱等舟師至城外城中先有神祠一所俗號城隍神儼于是順人心禱之須

與風浪大起凡斷其荻洪鐵鎖三次城人大喜以爲神助遂破填等隋書五行志梁武陵王紀祭城隍神將烹牛有赤蛇繞牛口是城隍之祀蓋始於六朝也至唐則漸遍唐文粹有李陽冰縉雲縣城隍記謂城隍神祀典所無惟吳越有之是唐初尚未列于祀典張曲江集有祭洪州城隍神文杜甫詩有十年過父老幾日賽城隍之句杜牧集有祭城隍祈雨文則唐中葉各州郡皆有城隍五代錢鏐有重修城隍神廟碑記書大梁開平二年歲在武辰顧寧人謂以城爲墻以戍爲武蓋以朱全忠父名誠曾祖名茂琳故避其嫌名而改陸放翁寧德縣城隍廟記所謂唐以來郡縣皆祭城隍是也宋史蘇

緘殉節邕州後交人入寇見大兵從北來呼曰蘇城隍來矣交人懼遂歸又范旺守城死邑人爲設像城隍以祭張南軒治桂林見土地祠令毀之曰此祠不經自有城隍在或問既有社莫不須城隍否曰城隍亦贅也然載在祀典是宋時已久入祀典也洪景盧夷堅志滑世昌所居應被火而城隍救之殿前程某部綱馬濟江以不祭城隍神而馬死過半鄱陽城隍誕辰士女多集廟下命道士設醮張通判之子病祟乞路當可符法治之俄有一金紫偉人至路詰之曰爾爲城隍神知張氏有鬼祟何不擒捉朱琮妾以妻王氏妬至于自刎遂爲祟朱請閻皂山道士禳之道士牒付城隍廟拘禁是時城

隍之祀一如郡縣有司官與今制大略相同矣吳澄記
江州城隍廟曰江右列郡以漢潁陰侯灌嬰配食按查初
江西城隍即係灌明太祖初封京師城隍為帝開封臨濠東
嬰并非配食矣平和睦以王府曰公縣曰侯洪武三年去封號但稱某
府縣城隍之神

韓昌黎為土地神

今翰林院及吏部所祀土地神相傳為唐之韓昌黎不
知其所始按夷堅志湖州烏鎮普靜寺本沈約父墓約
官于朝嘗每歲一歸祭掃其反也梁武帝輒遣昭明太
子遠迎之約不自安遂遷葬其父于金陵而捨墓為普
靜寺故寺僧祀約為土地神又宋史徐應鑣傳臨安太

學本岳飛故第故飛為太學土地神今翰林吏部之祀
昌黎蓋亦倣此

五聖祠

鈕玉樵謂明太祖既定天下大封功臣夢兵卒千萬羅
拜乞恩帝曰汝固多人無從稽考但五人為伍處處血
食可耳命江南人各立尺五小廟祀之俗謂之五聖廟
後遂樹頭花間鷄埒豕圈小有災殃輒曰五聖為祟
本朝有湯公斌巡撫江南奏毀之其禍遂絕述異記亦
載康熙八年秀水縣民郭季平為五聖所祟丙寅江蘇
巡撫湯公奏除五聖淫祀妖禍遂絕云云然寔未盡絕
也余少時見隣人王祥龍及俞奕干之女皆犯此祟謂

之神和病男則有女鬼與合女則有男鬼與合來則必有泄精遺血之事而山村野岸尺五小廟所在有之如汀州北姑子建昌木下三郎之類蓋幽明之際變幻無窮固非命甲所能禁也然玉樵謂起于明祖則未必然按夷堅志林劉舉將赴解禱于錢塘門外九里西五聖行祠遂登科爲德興尉到任奠五顯廟知爲五聖之祖祠也則五聖之祠宋已有之七修類稿又謂五通神卽五聖也然則五聖五顯五通名雖異而寔則同夷堅志所載韋子師病祟請客以符水治之見五通神銷金黃袍騎馬而去又醫者盧生托宿趙喜奴家其枕席天明但見所寢在五聖廟側草露之上武林聞見所載宋嘉

泰中大埋寺決一囚數日後見形于獄吏求爲泰和樓五通神如此之類不一而足而陳友諒僭號亦在采石五通廟則五聖者宋元已有之而非起于明祖矣

晏公廟

常州城中白雲渡口有晏公廟莫知所始及闕七修類稿乃知明太祖所封也時毘陵爲張士誠之將所據徐達屢戰不利太祖親率馮勝等十人往援扮爲商賈順流而下江風大作舟將覆太祖惶懼乞神忽見紅袍者挽舟至沙上太祖曰救我者誰也默聞曰晏公也及定天下後江岸當崩有豬婆龍在其下迄不可築有老漁教炙豬爲餌以釣之甕貫縉而下甕罩其項其物二足

推拒不能爬于土遂釣而出岸乃可成衆問老漁姓名曰姓晏條不見明祖聞之悟曰蓋卽昔救我于覆舟者也乃封爲神霄玉府晏公都督大元帥命有司祀之吾常所以有此廟也又續通考臨江府清江鎮舊有晏公廟神名戎仔明初封爲平浪侯

常州忠佑廟

常州有忠佑廟祀司徒陳杲仁相傳南唐封爲武烈帝故今俗以帝號稱之而郡人劉宗浩輯爲實錄一書謂公本晉陵人在隋立功授司徒沈法興其婦翁也大業末法興欲襲常州懼公不敢動乃詐以疾告公不得已往問疾飲中毒歸而卒後法興方剽掠公現形黑雲中

發神矢斃之唐初詔爲立祠乾符中以陰兵助裴璩討賊王郢有功封忠烈公廣明之亂神力示現賊不入浙西加封感應梁開平中封福順王淮南楊氏封忠烈王南唐時錢俶遣將來攻公以陰兵驅黑牛觸敵艦敗去乃册爲武烈帝宋又賜廟號曰忠佑此司徒祠于常之始末也按舊唐書沈法興爲吳郡守煬帝使與太僕丞元祐討賊樓世幹會煬帝被弑乃與祐將孫士漢陳杲仁執祐起兵又令杲仁破賊樂伯通法興自署江南道總管謁越王侗卽位乃上表自稱大司馬錄尚書事承制置百官以杲仁爲司徒是杲仁本隋將與法興通謀害其主帥而司徒之官又法興所授也新唐書并不言

承制但云法興以果仁爲司徒則其爲法興黨更不待言矣然常之人所以崇祀者實以自唐及五代宋以來歷著靈異故累請褒封至帝號今常州雲車之製甲天下相傳像公空中破敵時神兵也豈失節于生前而獨能反正于身後耶抑郡人所傳公爲法興所害者本是寔事而新舊唐書所記不無訛謬耶史冊所載往往有與傳聞互異者未必傳聞皆僞而史冊真也

常州忠義祠

常州有忠義祠祀宋末守城死事諸臣是時元兵至常郡守趙與鑒先遁郡人錢書以城降劉師勇復之朝議以姚訢知常州事王安節率兵守之自夏及冬拒守數

月伯顏驅城外居民運土填塹土至併人築之城破官

民盡殺無遺類得免者僅七人

事見續資治通鑑

常州屠戮之慘

自開闢以來未有也

伯顏因常州拒守至平江疑有備乃不煩兵而下因笑曰常州紙城鐵人平江鐵城紙人祠

中神位首文天祥時爲安撫大使知平江遣兵來救者也次姚訢次王安節一文臣一武臣皆城主也次陳炤郡人爲通判助守者也次師勇先復常州後城陷遁去卒死於閩中者也次判官郡人胡應炎次知武進縣包圭皆城破身死者也次巡檢尹玉麻士龍卽信國遣來援士龍戰死虞橋玉戰死五牧者也次知無錫縣阮應得鄭所南集作阮正已其子亦從父投水死常州破後兵至無錫亦殉節者也次僧人萬安道士徐道明巡檢方允武溧陽尉莫謙之皆

同守常州同死節者也而元末守土死事之武進縣令劉溶亦附焉從其類也今以宋元二史考之尚有遺漏者陳炤傳錢嘗以城降後有淮民王通居常州陰以書約師勇爲內應師勇遂復常州則王通宜增祀也伯顏傳常州守判旣降師勇與張彥王安節復之彥尋被執於呂城不能完節固難從祀而安節傳常州旣復命安節與張詹共守則張詹宜增祀也尹玉傳謂師勇復常州後卽赴平江而張世傑傳則云師勇守常州城陷拔柵出走其弟馬墮墜躍不能出師勇舉手與訣而去惜其弟名不傳此亦宜增祀者也宋史又謂莫謙之宜與僧人起義兵歿於戰贈武功大夫則謙之官號所謂溧陽尉者宜改書也元史劉良傳良爲常州萬戶府知事張士誠來攻城陷良赴水死武進縣尹劉溶戰於葛仙橋亦死是與溶同戰死者尚有劉良今溶旣附祀則良亦宜增祀也

近日忠義祠內增入劉忠毅熙祚馬文肅世奇王節愍章金忠潔鉉皆明末死國難者劉巡按湖南死於永州馬王金官京師死甲申之變以之附祀固宜然實有不必者此祠之建本因宋末常州守土諸臣以身殉城故血食於此而祠創於前明故并元末守常州死事之武進令劉溶亦附焉凡以祀守常州殉節之人非祀常州人之殉節於外者也若并祀常州人

之殉節於外者則又不止此四公即以前明季而論宜興盧忠烈公象昇戰死於鉅鹿南都亡後其弟中書象觀赴水死從弟象同拒戰死又有王行儉崇禎十年進士守重慶府張獻忠之難被擿而死吳炳為永明王大學士兵敗自縊於湘山寺莫可及為長沙照磨攝寧鄉縣事流賊破城力戰死子若鼎若鉅亦遇害史夏隆為南昌推官集兵守城城破殉難皆蓋與無錫堵允錫仕永明王死於潯州王孫蘭為韶州副使流賊將至城中人盡逃乃自縊死龔廷祥宏光中為中書舍人城破步至武定橋赴水死皆無錫人而江陰舉人夏維新武舉黃略諸生許用明史侯喇會傳內作許用縣志作許用德王華呂九韶

以守城死貢生黃毓祺出亡後仍抗節死閻應元傳內江陰死事之人更多見明史第二百七十六卷此皆常郡人也劉馬四公既祀則此十數公者不當增祀乎若謂劉馬四公死流賊之難其餘則多抗本朝故不得與然本朝修史已備書之或專傳或附傳皆不沒其實則亦何不可增祀乎况莫可及王孫蘭等亦皆死流賊之難者乎若謂盧堵數公皆常之屬縣人故不祀於郡堵允錫明史作無錫人邵青門集作宜興人然四公內馬文肅亦無錫人非郡城中武進人也何取此舍彼乎况武進人尚有薛聞禮薛應玠聞禮為黃陂典史流賊所設偽官至為士民殺死聞禮令士民盡逃獨以身

當之爲張獻忠所殺應玠攝龍州事李自成來攻城
破罵賊死又吳鍾巒魯王監國時爲禮部尚書兵敗
入昌國衛抱孔子木主自焚死鍾巒之子名福之亦
舉兵太湖中據長白蕩爲大清兵所執殺於江寧
又何以不祀乎且劉忠毅之弟永祚守興化城破仰
藥死親兄弟也祀其一而遺其一可乎此當日增祀
時不及詳考遂致掛一漏百本欲表揚常州之忠節
而適以形常州忠節之少也愚謂常州忠義祠內本
不必增此四公福王時南都建旌忠祠馬王金三公
已在正祀之列我

世祖章皇帝又命所在給田七十畝建祠致祭

俱見明史則

馬王金三公本有專祠永州當亦有劉忠毅祠若本
郡則宜入鄉賢而不必混于守常州死事諸臣之內
旣欲增祀此四人矣則當于祠內隙地另建一堂彙
祀常州人之殉節於外者而虛堵諸公並列祀焉庶
不致貽笑于考据之疎也

陔餘叢考 卷三十六 四

陔餘叢考卷三十六

陽湖 趙翼 耘菘

至尊

臣稱君為至尊吳青壇謂起于孫吳之世據三國志周瑜病與孫權書曰曹公在北劉備寄寓此至尊垂慮之日魯肅謂權曰願至尊威德加乎四海呂蒙曰關羽所以未便東下者以至尊聖明蒙等尚存也陸遜謂蒙曰下見至尊宜好為計俱見吳志而魏志蜀志皆無之故知此稱起於吳俗也然此亦未詳考賈誼過秦論履至尊而制六合則西漢已有此語後漢書董卓欲遷都陳紀曰宜修德政以懷不附遷移至尊非計也獻帝起居

陔餘叢考 卷三十六

注見三國志註郭汜兵遮帝車不得前侍中楊琦高舉車帷帝曰汝何不却而敢迫近至尊則漢末已有是稱又史記漢武本紀朕以渺渺之身承至尊律書秦滅六國登至尊之日淺漢書路溫舒傳陛下初登至尊朱博傳匹夫相要尚得相死何況至尊外戚傳史皇曾孫收養掖廷遂登至尊位王章傳章劾奏王鳳曰鳳知張美人已適人不宜配至尊乃托言宜子納之後宮王莽傳未央宮置酒為傅太后張幄坐太皇太后側莽按行令曰定陶太后藩妾何得與至尊並遂撤去哀帝崩太皇太后詔曰定陶太后與至尊同稱號非禮宜廢五行志趙皇后由微賤登至尊是至尊之稱見於西漢者且不一而足

安得謂起于孫吳之世耶又按魏志司馬懿奏誅曹爽謂其使張當看察至尊廷尉鍾毓奏李豐等迫脅至尊大逆無道則魏亦有至尊之稱非獨稱于吳也後世又有稱大尊者北史後周宣帝時屢赦京兆丞樂運上疏曰大尊豈可數施非常之恩是也又人主之稱曰上史記封禪書有今上字後世人臣稱君曰上始此又莊子云今處昏上暗主之間則人主稱上又自戰國始漢書宣帝紀詔曰吏增辭飾非上亦無由知師古曰上天子自謂也漢藝文志孝武世書缺簡脫聖上喟然而稱曰朕甚憫焉人君之稱聖上始此三國志註引英雄記曰呂布為曹操所攻遣許汜等求救于袁術曰明上今不

救布布破明上亦破也術時已僭號故云然則又有稱人君爲明上者後魏元遙傳遙以本服絕應除屬籍乃表云臣去皇上雖是五世之遠皇上二字見此

寡人

春秋戰國時諸侯王皆稱寡人至漢猶然加漢王爲義帝發喪遣使告諸侯曰寡人親爲發喪及諸侯王上皇帝號漢王曰寡人聞帝者賢者有之文帝爲代王時諸大臣迎立之卜有天王之詞帝曰寡人固已爲王又何王乎韓信爲齊王時謂蒯通曰先生相寡人何如淮南王黥布對隨何曰寡人北面而臣楚吳王濞反亦稱寡人以約諸侯王東漢北海王睦遣使朝賀謂所遣使曰

朝廷若問寡人大夫將何辭以對是東漢猶有此稱也至東漢之末則袁紹劉表曹操孫權劉備之徒無不稱孤惟孫盛魏晉春秋記曹操謂諸將曰劉備人傑也將生憂寡人裴松之以爲盛著書多用左氏以易舊文則此稱或卽盛所演文而非當時實語也

按左傳吳王對趙鞅使者曰句踐將生憂寡人

北史魏東陽王元榮辟令狐整爲主簿曰寡人當委以庶務肅諾而已宇文泰爲丞相時謂權榮曰寡人與權從事未嘗見失信宇文護當國將廢孝閔帝告公卿曰先王勤勞天下三十餘年寡人地則猶子親受顧命奉略陽公立之革魏興周爲四海主乃荒淫無度社稷必致傾覆寡人若死將何以見先王於地下隋書庾季才

傳字文護謂季才曰公既是王官無煩別詣寡人也又
隋時徐則絕粒養生既死而支體柔弱如生數旬不變
晉王廣下書曰寡人欽承道風久餐德素宜送還天台
定葬云云史策之稱寡人者惟此按是時爾朱榮高歡
之徒皆稱孤獨此數公稱寡人意當時諸侯王原有兩
稱耶唐書德宗時宮市之弊最甚順宗時爲太子曰寡
人見上當極言之五代史郭威遣馮道迎漢高祖從子
贊于徐州將立之既而中變又遣郭崇以兵來迎贊謂
道曰寡人此來所恃者以公三十年舊相是以不疑耳
此又唐以後稱寡人之故事也

稱孤

老子道化章人之所惡惟孤寡不穀而王公以爲稱戰
國策顏觸亦曰孤寡者人之困賤下位也而侯王以之
自謂蓋古人自稱皆從謙詞按禮記庶方小侯自稱曰
孤諸侯自稱曰寡人其在凶服曰適子孤是孤本小侯
之稱諸侯遭喪則亦稱之此定制也晉悼公將立謂諸
大夫曰孤始願不及此此未爲君之詞猶沿遭喪稱孤
之禮也諸侯或遇危難則亦有稱孤者臧文仲曰列國
有凶稱孤禮也晉惠公失國使郤乞歸子金教之言曰
孤雖歸辱社稷矣楚莊王伐鄭鄭伯肉袒牽羊以逆曰
孤不天不能事君孤之罪也此皆因危難而有此稱其
他如屈瑕敗于羅楚子曰孤之罪也孟明敗於殺秦伯

曰孤違蹇叔以辱二三子孤之罪也則亦以喪敗而自為貶損之詞非諸侯本稱也猶之不穀本蠻夷君長之稱而周襄王以王子帶之亂告難于魯亦稱不穀也左

傳天子內服降名禮也註降名稱不穀也

按召陵之盟齊桓公自稱不穀楚共

王享晉公子重耳亦自稱不穀此則無所危難而過自謙之詞戰國時諸侯王猶稱寡人惟燕昭王謂郭隗曰孤誠知力不足以報齊然誠得賢士以雪先王之恥孤之願也蓋昭王初立猶是適子孤之遺意衛君謂如耳曰孤請以衛世世事先生此則小侯之本稱魯仲連勸燕將曰當封之如陶衛世世稱孤亦謂封之如庶方小侯耳及秦漢之間而孤已為南面之雄稱田橫曰吾始與漢王皆南面稱孤韓王信對使者曰陛

下擢僕閭巷南面稱孤可見是時為侯王美稱非復古制適子孤及庶方小侯之詞矣然史記漢書文內亦不見有稱孤者至漢末及三國群雄之割據僭竊者始稱之三國志曹操下教使天下無孤不知幾人稱帝幾人稱王又孫權雖已僭帝位惟詔命稱朕而對臣下言尚稱孤其誅呂壹後責諸葛瑾等書曰自孤軍興五十年所又曰今孤自省無桓公之德而諸君諫諍未出於中蜀先主稱帝後為孫桓所敗嘆曰昔見桓尚小兒而今迫孤乃至此也唐書朱滔王武俊田悅李納連衡拒朝命各僭為王推滔為盟主滔稱孤武俊悅納稱寡人則反以孤為大寡為小僭竊之徒固不知考訂禮文也

白虎通公者謂三公及三王後也此說本公羊傳柳子厚房公銘亦謂天子之三公稱公王者之後稱公諸侯入為王卿士稱公此皆以爵位稱者也然美稱所在輒多借用周時本國之臣已稱其君皆曰公如闕宮詩乃命魯公俾侯於東孔子修春秋凡書魯君皆曰公則已不拘三公及二王後矣後世遂益有濫及者年之長老尊其道而師之亦稱公則如毛公申公之類孔文舉告高密縣為鄭康成特立一鄉云昔太史公廷尉吳公謁者僕射鄧公又商山四皓有園公夏黃公皆悉稱公然則公者仁德之正號不必三事大夫也今鄭君鄉宜曰鄭公鄉又

吳志程普年最長時人皆呼程公南史南齊宮中有婦人韓蘭英自宋孝武以來常在宮為女博士教書學宮中呼為韓公此皆以年老稱公者也至文舉謂太史公亦以年德稱公則甚誤吳斗南云春秋之世楚縣令皆稱公如沈諸梁為葉令稱葉公蓋楚君已僭稱王故縣令亦稱公所謂諸侯縣公皆慶寡人是也漢高祖初起兵亦從楚制稱沛公其後曹參為戚令稱戚公夏侯嬰為滕令稱滕公司馬遷自稱太史公者亦以官為中書令也此又令之稱公者也太史是遷襲其父之官被刑後又兼中書令之職武帝時以宦者為中書令故也又彼此相呼亦稱公戰國策毛遂所謂公等碌碌晉書樂志公莫舞註所謂古人相呼曰公是也方外亦有稱

公者如遠公支公之類是也有孫呼祖爲公者按呂氏
春秋孔子之弟子從遠方來孔子問之曰子之公有恙
乎次及其父母兄弟妻子是祖之稱公其來最古北史
鄭道育常戲徐之才呼爲師公之才荅曰旣爲汝師又
爲汝公在三之義頓居其兩南史何偃呼顏延之爲顏
公延之以其輕脫乃曰身非三公之公又非田舍之公
又非君家阿公何以呼爲公此皆古人以祖爲公之故
實也今江南人猶稱祖爲公公有子稱父亦曰公者列子黃帝篇家公執
席戰國策陳軫將赴魏王之召其子陳應止其公之行
曰魏欲絕楚齊必重迎公郢中不善公者欲公之去也
必勸王多公之車此子稱父爲公也又有人臣稱帝王

亦曰公者南史焦度傳度欲向孝武求荊州不知所以
置詞親人授之數百言習誦數日略皆上口及見上猝
忘所教曰度啟公度啟公梁武納齊東昏妃余氏頗妨
政事范雲諫未納王茂曰雲言是公必以天下爲念無
宜留惜此又人臣之稱帝爲公也有以父稱子而亦曰
公者史記晁錯更漢令削七國其父聞之謂錯曰上初
卽位公爲政用事侵削諸侯疏人骨肉口語多怨公何
謂也錯曰不如此天子不尊崇廟不安父曰劉氏安晁
氏危吾去公歸矣凡三呼其子爲公陸賈傳賈亦呼其
子爲公五代史李克用養子存信從克用與劉仁恭戰
大敗克用怒曰昨日吾醉公獨不能爲我戰耶宋史蔡

京懷奸固位王黼忌之乃稱旨遣童貫偕京子攸往取致仕表京一時失措自陳曰京衰老宜去而不忍乞身者以主恩未報此二公所知也左右聞京併呼其子為公皆竊笑亦見甕牖間評按父呼子為公可與子呼父為母作對此父稱子為公之故實也又人主稱其臣亦有曰公者漢書景帝謂謁者僕射鄧公曰公言善吾亦恨之武帝謂田千秋曰父子之間人所難言公獨明其不然是高廟神靈使公教我也後漢書光武救吳漢曰賊若出兵綴公以大眾破尚尚敗公亦破矣南齊書周盤龍大敗魏軍高帝以金釵二十枚與其愛妾杜氏手救曰餉周公阿杜此又君稱臣為公之故實也按六朝以來大臣之為三公者人主稱之皆曰公唐初猶然南北朝各史可考

卿

六朝以來大抵以卿為敵以下之稱王戎妻呼戎為卿戎曰婦那得卿婿答曰親卿愛卿是以卿卿我不卿卿誰復卿卿山濤謂妻曰我當為三公不知卿堪作夫人否夫呼妻為卿則無詞妻呼夫為卿則謂不可益見卿為敵以下之稱也世說王夷甫不與庾子嵩交庾卿之不置王曰君不得為爾庾曰卿自君我我自卿卿我自用法卿自用卿法南史王規傳朱異嘗因酒卿規規責以無禮南齊陸慧曉見士大夫未嘗卿之曰貴人不可卿賤者乃可卿人生何容立輕重於懷抱故常呼人官位北齊祖信年少時父遜為李庶所卿信欲報之乃

諸庶謂曰暫來見卿還辭卿去唐張易之謂宋璟曰公
方今第一流人何乃下坐璟曰才劣位卑張卿以爲第
一人何也天官侍郎鄭杲謂璟曰中丞奈何卿五郎璟
曰以官言之正當爲卿足下非張卿家奴何郎之有
君侯

衛宏漢官舊儀列侯爲丞相相國者號君侯又云丞相
之刺史及侍御史皆稱卿不得言君蓋其時丞相稱君
而以列侯爲之故兼稱君侯也按丞相稱君本沿戰國
之制田文相齊封孟嘗君蘇秦相趙封武安君是也至
如謝萬謂王述曰人言君侯癡君侯信自癡李白與韓
荆州書亦曰君侯此則非列侯爲相者蓋自漢以來君

侯爲貴重之稱故口語相沿凡稱達官貴人皆爲君侯
耳

世父母

今人謂伯父母叔父母皆曰世父母按鄭康成云世父
伯父也賈疏伯父言世者其繼世者也邢昺亦曰繼世
以適長先生於父則繼世者也然則世父專指繼世之
伯父猶國君嫡子之稱世子也雲谷臥餘謂爾雅釋親
四章總無伯字但稱父之昆弟先生者曰世父後生者
曰叔父稱父之兄妻曰世母父之弟妻曰叔母夫既可
謂叔父叔母則亦可謂伯父伯母矣何以不言伯也云
云按伯父之稱亦見於禮記曾子問婿使人弔女之父

母若父母不在則稱伯父世母伯父即世父世母即伯
母互文也鄭注又云若伯父母不在則稱叔父母蓋見
叔父母之非世父母也白虎通亦云父之昆弟不俱謂
之世父父之女昆弟俱謂之姑何也諸父內親故別稱
之也姑外適人故疎而總稱之也

太公

輟耕錄云今人稱曾祖曰太公非也以之稱祖爲是後
漢李固之父邵爲司徒及固伏誅曰固女泣曰太公以
來積德累仁何以遇此注太公謂祖父邵也據此則太
公當稱祖矣魏了翁古今考云古人稱父曰太公漢高
祖之父曰太公齊世家云西伯獵遇呂尚曰吾太公望

子久矣亦謂王季也後漢書袁譚袁尚兄弟相攻劉表
以書諫譚曰孤與太公志同願等戮力乃心共獎王室
此孤與太公無二之所致也功績未卒太公殂隕云云
太公謂其父袁紹也又隋末郭子和起兵自稱永樂王
亦尊其父爲太公據此則太公又當稱父矣然南史齊
高帝令左右拔白髮問曾孫昭業曰兒言我誰耶荅曰
太翁高帝笑曰豈有爲人作曾祖而拔白髮者乎則曾
祖之稱太翁其來已久蓋古今稱謂不同今人既呼祖
曰公則呼曾祖爲太公亦等級之自然者也

或疑太翁與太公稱謂不同不知古人翁與公通稱
北史李訢傳魏太武詔崔浩選中書學生爲助教浩

選三人而李訢不與帝曰何不取幽州刺史李崇老翁兒來訢崇之子也蔣少遊傳少游以工藝進人望頗輕高允特稱為士族文明太后謂百官曰本謂少游作師耳謂畫師也高允老公乃謂其人士李元忠傳元忠初勸齊神武起義成霸業後因宴集戲謂神武曰若不與侍中當更覓建義處神武曰建義不慮無止恐如此老翁不可遇耳杜弼傳神武謂弼曰今江東又有一吳老翁蕭衍專事衣冠禮樂士大夫望之以為正朔所在又神武臨終謂其子澄曰庫狄干鮮卑老公斛律金勅勒老公並性忠直終不負汝彭城王浟傳浟為定州刺史去任有老公數百人獻食於道

左平鑿傳和士開索其愛妾阿劉鑿即與之仍謂人曰老公失阿劉與死何異要自為身計不得不爾王軌傳軌侍周武帝宴將帝鬚曰可愛好老公但恨後嗣弱耳以上數條可見公與翁皆年老之通稱也

繼室側室之誤

世以續娶之妻為繼室非也左傳惠公元妃孟子卒繼室聲子生隱公若繼室即妻則隱公當立無疑矣何必始終稱攝欲俟桓公長而立之杜預註聲子蓋孟子之姪姊也諸侯始娶則同姓之國以姊姪媵元妃死則次妃攝治內事猶不得稱夫人故謂之繼室也據此則繼室乃長妾之攝內事者耳非續娶之妻也宋武公生仲

子歸于魯生桓公此在元妃孟子已卒之後似後世之續娶者然不曰繼室蓋見續娶之不曰繼室也臧桓叔娶于鑄生賈及為死繼室以其姪生紇註女子謂兄弟之子為姪則亦媵妾之類也惟齊景公使晏嬰請繼室於晉時齊女少姜有寵於晉平公而死故更以女繼之則繼室似續娶之稱不知少姜之在晉本非夫人也觀齊送少姜時齊使陳無宇送晉侯謂無宇非卿而執之杜註欲使齊以適夫人禮送少姜也欲使以適夫人之禮明乎少姜本非適夫人也則亦不得以繼室為繼娶之妻也白虎通天子必一娶何也明人君無再娶之義也蓋古者人君不再娶妻死則以其姪娣之媵者為繼

室後人遂以續娶之妻亦為繼室也由白虎通之言觀之則以續娶為繼室其起于漢以後歟又俗以妾為側室亦誤也左傳晉侯命太子曰仇而命太子之弟曰成師封于曲沃師服曰天子建國諸侯立家卿置側室杜註建國者封餘子為侯也立家者使餘子為卿大夫也側室者衆子也卿有衆子得立此官以處之也然則側室乃嫡子外之衆子非必妾所生子也即嫡母所生之第二子亦側室也側室之稱係乎子不係乎母也士會謂秦伯曰趙有側室曰穿晉君之婿也不曰側室子而直曰側室可見側室即衆子也註亦曰側室支子也師曠對晉侯曰天子有公諸侯有卿卿置側室註亦謂側

子經書所載未有稱姪者姪乃兄弟之女也正韻兄弟之女曰姪又釋名姑謂兄弟之女曰姪是也故姪字從女旁也又女子謂兄弟之子亦曰姪見爾雅釋親篇左傳所謂姪其從姑又唐書狄仁傑傳仁傑諫武后曰姑姪與母子孰親是也按顏氏家訓兄弟之子北人多呼爲姪則以從子爲姪起於北朝杜工部詩嗣宗諸子姪早覺仲容賢杜牧之詩小姪名阿宜則唐時久已稱姪矣聞見錄宋真宗過洛幸呂蒙正第問諸子孰可用對曰臣諸子皆豚犬有姪夷簡宰相才也此又宋人以兄弟之子爲姪之証

夫兄稱伯

叔嫂之稱見於經書而婦人呼夫之兄爲伯則無所據爾雅釋親篇但曰兄公耳然稱伯則由來已久五代史補李濤弟澣娶婦竇氏出叅濤濤荅拜澣曰新婦叅阿伯豈有答禮雲谷臥餘云爾雅稱夫之弟爲叔則夫之兄亦可爲伯也容齋隨筆記宋慶歷中陳恭公爲相以曾公亮自起居注除天章閣待制陳之弟婦曾出也陳語之曰六新婦曾三做從官想甚喜應聲對曰三舅荷伯伯提挈極喜只是外婆不樂陳問何故曰外婆責三舅以第五人及第當過詞掖今朝廷如此處置必是廢學故耳蓋陳不由科第不諳典故受訊於弟婦如此據此則弟婦稱夫兄爲伯宋時已然而夫之兄呼弟婦爲

新婦外孫女呼外祖母爲外婆亦見于此

夫弟稱小郎

女呼夫之弟曰小郎是六朝人語晉書謝道韞爲小郎解圍世說王衍妻使婢擔糞王澄諫之嫂曰太夫夫臨終以小郎囑新婦不以新婦囑小郎南史孫棘傳棘與弟薩欲相代死棘妻許氏亦寄語棘曰君當閉戶豈可委罪小郎且大家臨亡以小郎屬君謝道韞奉兄純之喪還經西塞遇風喪舫漂不知所在述乘小舟尋求經純妻庾舫過庾遣人謂曰小郎去必無及寧可存亡俱盡耶述不聽

左傳齊桓公多內嬖有如夫人者六人後世稱人之妾爲如夫人本此也後漢書竇融傳融女弟爲大司空王邑小妻又宗室四王三侯傳趙惠王乾居父喪私媾小妻註小妻妾也孫鑛據此謂小妻之稱起自范史然前漢書外戚恩澤侯表陽都侯張彭祖爲小妻所殺枚乘傳乘在梁時取皐母爲小妻孝成許皇后傳后姊嬀寡居與定陵侯淳于長私通因爲之小妻孔光傳定陵侯淳于長小妻廼始等六人則小妻之稱前漢已有之後漢書陳王鈞取掖庭出女李嬈爲小妻樂成王黨娶中山王傅婢李羽生爲小妻又梁王暢傳臣小妻三十七人其無子者聽還本家此又小妻之稱之見於范史者

也亦謂之傍妻元后傳王禁好酒色多取傍妻是也又謂之下妻王莽傳立國將軍建奏言今年癸酉不知何一男子遮臣建車前自稱漢氏劉子輿成帝下妻子也後漢書光武紀詔依托人爲下妻欲去者聽之師古曰下妻猶言小妻又新唐書楊慎矜傳王鉞與李林甫作飛牒告慎矜蓄識緯妖言規復隋室帝怒收慎矜御史崔器索讖書於慎矜下妻臥內得之詔賜死是也又謂之少妻後漢書董卓傳卓將朝升車而馬驚墮泥還入更衣其少妻止之不從遂入爲呂布所殺是也又謂之庶妻王世充傳世充祖死其妻與霸城人王粲爲庶妻其父收從之因冒粲姓是也小妻傍妻下妻少妻庶妻

皆妾之稱也

夫子

邢昺疏謂孔子所以稱夫子者孔子嘗爲魯國大夫子者男子之稱故弟子連官稱尊之以別於餘人按此說非也左傳孟明之敗或勸秦穆公殺之公曰孤實貪以禍夫子夫子何罪甯嬴論陽處父曰夫子其不歿乎晉賈季奔狄趙盾使史駢送其帑或勸駢殺之駢曰夫子禮于賈季我報私怨不可楚薳子馮曰吾見申叔夫子所謂生死而肉骨者韓宣子聘齊齊大夫多笑之晏子曰夫子君子也鄭子皮死子產哭曰惟夫子知我子產勸子大叔爲政以猛不從旣而多盜悔之乃曰吾早從

夫子不及此孟僖子病謂家臣曰必屬說與何忌於夫子國語晉悼公初居于周單襄公論之曰此十一德者夫子皆有焉楚莊王以教太子之事問申叔時申叔時曰夫子踐位則退夫子指太子也屈到嗜芟既卒宗老將薦芟曰夫子屬之夫子指到也沈子高曰楚國之平均者夫子也夫子謂子西也是夫子本春秋時先生長者之稱故孔門弟子稱孔子皆曰夫子顏淵曰夫子循循善誘曾子曰夫子之道忠恕子貢曰夫子之文章蓋皆沿當時之稱非特創也惟專稱曰子則自孔門弟子之稱孔子始如論語所記及孟子禮記所引孔子之言皆稱子曰中庸雖有仲尼曰然係首引孔子之言以後

卽皆稱子曰明乎子曰仲尼也此則孔門創例孔子以前未有專稱子者也然則專稱子乃孔門所創而稱夫子則當時所同邢昺所云以孔子嘗爲大夫而連官稱之以別於餘人者乃臆說也厥後因孔門有夫子之稱於是夫子遂爲師之專稱如史記司馬相如傳有嚴忌夫子鄒陽傳亦曰枚先生嚴夫子註當時尊尚師稱之北史斛斯微傳周武帝命徵授皇子經諸皇子皆呼徵夫子是也因孔門有專稱爲子之例於是又有以子爲師之專稱者公羊傳序有子公羊子子司馬子何休釋曰加子于姓上名其爲師也若非師而但有德者不以子冠氏也梁溪漫志云列子書亦其門人所集故曰子

列子子冠氏上明其爲師也不但言子者所以避孔子也又陳后山以南豐辨香稱爲子曾子朱晦菴稱周程曰子周子子程子亦自托於弟子之列也此又皆因孔門之稱而援以爲例者也

門生

唐以後始有座主門生之稱六朝時所謂門生則非門弟子也其時仕宦者許各募部曲謂之義從其在門下親侍者則謂之門生如今門子之類耳宋書王微嘗將門生兩三人入山采藥南史庾子輿之官巴陵病篤不肯入廨因勒門生不許輒入城市何敬容罷官後起爲侍中其舊時賓客門生喧譁如舊冀其復用顧協有門

生始來事協知協廉不敢厚餉止送錢二千協怒杖之二十東昏時丹陽尹王志被驅急步走惟將二門生自隨臧嚴爲武寧郡守郡多蠻俚前守多以兵自隨嚴獨以數門生單車入境北史崔彧精于醫廣教門生令多救療此數者以之移作門弟子尚可通至如沈慶之佐孝武起兵元凶劭使慶之門生錢無忌齎書使之解甲慶之執以見孝武薛安都降魏大見禮重至于門生無不收敘慶之安都皆武人目不知書若如後世受業弟子安得有此又謝靈運因祖父之業奴僮旣衆義故門生數百鑿山後湖功役無已則并用之工役矣王僧達爲吳郡守西臺寺多富沙門僧達求須不遂乃遣主簿

顧曠率門義劫寺得數百萬門生義從也則并用之劫掠矣劉義宗坐門生杜德靈放橫打人免官德靈以姿色故義宗寵之則又取其姿媚矣徐湛之門生千餘皆三吳富人千姿質端美衣服鮮麗宋孝武責沈勃周旋門生競受賄賂少者至萬多者千金則并大收其賄賂矣又徐湛之謀逆謂范蔚宗曰已報臧質悉携門生義故前來故應得健兒數百則并用之叛逆矣劉懷珍北州舊姓門附殷積啟上門生千餘人充宿衛則其武勇并可充禁旅矣合此數事以觀則門生不過如僮僕之類非受業弟子也其與僮僕稍異者僮僕則在私家此蓋在官人役與胥史同顧琛傳尚書等門有制八

坐以下門生隨入者各有差不得雜以士琛以宗人顧頌尚書張茂度門名而私與頌同席坐乃坐譴益可知門生者正如胥史之類也然富人子弟多有爲之者蓋其時仕宦皆世族而寒人則無進身之路惟此可以年資得官故不惜身爲賤役且有出財賄以爲之者陸慧曉爲吏部尚書王晏典選內外要職多用門生義故慧曉不甚措意王琨爲吏部自公卿下至士大夫例用兩門生江夏王義恭屬用二人後復有所屬琨不許此可以見當日規制也顧寧人旣謂六朝門生與僮僕同而謂其非在官之人則未知門生有可入仕之路則不得謂非在官人也

按漢時門生本非弟子之稱蓋其時五經各有專門名家其親受業者爲弟子轉相傳授者爲門生如所云爲梁邱氏學爲歐陽氏學之類也後漢書楊厚傳門生上名錄者三千餘人曰上名錄則不必親受業但習其學卽是也賈逵傳詔諸儒各選高才生受左氏春秋及古文尚書逵所選弟子及門生皆拜爲郎曰弟子及門生可見門生與弟子有別也鄭康成傳康成沒門生相與撰其問荅諸弟子之詞依論語爲鄭志以弟子問荅之詞而門生撰述之蓋如論語所謂門人受業于弟子者也李固傳固下獄門生王調貫械上書證其枉及固死陳屍於路固弟子郭亮負

鉄鎖乞收固屍曰門生曰弟子又可見門生之非弟子也惟其不必親受業但爲其學者皆可稱門生於是依勢趣利者并不必以學問相師而亦稱門生如鄧壽傳壽爲京兆尹時大將軍竇憲貴盛使門生賫書有所請壽卽送詔獄楊彪傳黃門令王甫使門生于郡界中辜權財物七千餘萬彪發其奸憲權臣甫奄寺豈有學術教人而亦有門生蓋卽後世拜門生之陋習也浸尋至六朝遂更爲門下僚從之稱耳

門子

今世所謂門子乃牙署中侍茶捧衣之賤役也古時則否左傳戲之盟鄭六卿及其大夫門子皆從鄭伯杜註

又道士之所本也

居士

輟耕錄云今人多以居士自號考之六經惟禮記有居士錦帶注謂道藝處士也吳曾能改齋漫錄云居士之號起於商周之時韓非子書曰太公封於齊東海上有居士狂裔華士昆弟二人立議曰吾不臣天子不友諸侯耕而食之掘而飲之云云則居士之名由來久矣南史阮孝緒屏居一室家人莫得見其面親友因呼為居士到洽築室岩阿幽居積歲時人號曰居士虞寄居閩中知刺史陳寶應有異志恐禍及乃著居士服居東山寺魏書盧景裕不仕貞素自得人號為居士

徵君徵士

有學行之士經詔書徵召而不仕者曰徵士尊稱之則曰徵君後漢書黃憲傳天下號憲為徵君魏志王肅傳魏初徵士燉煌周生烈註經傳頗行於世又管寧傳註引傅子曰胡徵君怡怡無不愛也年八十而不倦于書吾于胡徵君見之矣胡徵君謂胡晦也後魏高允作徵士頌凡四十二人皆與允同徵者

野老

詩人多用野老字不過謂田野老人耳按漢書藝文志有野老十七篇註云六國時人在齊楚間應劭曰年老居田野相民耕種故號野老則二字所出最古矣

陔餘叢考卷三十七

陽湖

趙翼

耘菘

耘菘

博士待詔大夫郎中

黃省曾吳風錄謂張士誠走卒廝養皆授官爵至今呼
椎油作麵傭夫皆為博士刺工為待詔云按明祖實錄
洪武中已命禮部申禁軍民人等不得用太孫太師太
保待詔大官郎中等字為名稱其時去淮張未遠而民
俗濫稱已遍至煩明禁則由來已久未必起于士誠也
又陸容菽園雜記醫人稱郎中鑷工稱待詔磨工稱博
士師巫稱太保茶酒稱院使此草率名分國初有禁云
然亦不言起于淮張則知非一日也今江南俗椎油賣

茶者尚稱博士鑷工尚稱待詔醫生尚稱郎中而北俗則稱醫生爲大夫按博士本師長之稱漢武帝立五經博士爲置弟子五十人後四方來學者皆詣博士受業故其時弟子稱師皆曰博士沿及六朝此風不改宋書王微爲兒時從博士讀小小章句北史劉晝知宋世良家多書乃求爲其子博士恣意披覽北齊張景仁教太原王紹德書武成帝又令景仁侍後主書後主呼爲博士登極後與左右語猶稱張博士武成又爲琅琊王儼求博士得張彫武與景仁號二張博士後周文帝置學東館教諸將子弟以樊深爲博士可見博士猶先生云爾封氏聞見記御史大夫李季卿宣慰江南時茶飲初

盛行陸鴻漸來見衣野服隨茶具而入旣坐乃手自烹茶口通茶名區分指點李公心鄙之茶罷命奴子取錢三十文酬煎茶博士此茶博士之名之始也蓋其時茶事初起精其技者尚少故有茶博士之稱而李公因其稱以嘲之可見是時賣茶者無不稱博士也舊唐書開元十一年命州縣置醫博士二人則醫亦稱博士也其椎油者之稱博士蓋亦因專習其技而有是稱或因煎茶者稱博士而倣之耳按博士之始本起於戰國漢書貢山傳其祖祛故魏王時博士弟子也秦亦有此官史記始皇本紀侯生盧生曰博士雖七十人特備員弗用又始皇不樂輒令博士爲仙真人詩令樂人歌弦之漢初亦設此官不過待問未有進用者至武帝立五經博士遂爲師儒之宗此博士之沿革也待詔之稱古來原多雜流舊唐書翰林有台鍊僧道祝卜術藝書奕各別院以廩之天寶中有嵩山

道士吳筠乾元中有占星韓穎劉烜貞元末有奕棊王叔文侍書王伾元和末有方士柳泌浮屠士通寶歷初有善奕王倚興唐觀道士孫準並待詔翰林遼時翰林畫院有畫待詔翰林醫院有醫待詔前明文徵明亦以能書待詔可見翰林中待詔者原不皆文學之士則鑷工之稱待詔蓋亦實有以此技爲待詔者而人因以稱之也若醫生之稱郎中大夫顧寧人以爲起於宋時而引老學菴筆記醫生曰牙推卜相曰巡官之類以証之按牙推之名不自宋始唐鄭注以藥術于李愬愬嘗之署爲牙推則醫生之稱牙推起于唐也北夢瑣言後唐莊宗劉皇后之父舊以醫爲業莊宗殿日負藥囊令子繼岌破帽相隨自稱劉衙推訪女直入后宮后大怒然亦第意擬之詞而未見郎中大

夫之的據按夷堅志鄒醫趙珪本上官彥成之隸粗得其術人稱爲趙三郎中又劉師道業醫有婦人托爲魏師成之妻求其療夫疾劉初不知魏已死也至則魏伸手求診脉覺骨節堅冷如木石婦忽笑曰劉郎中細審此病不可醫也劉曰娘子拉我來何忽如此婦曰郎中試看俄化爲狐去又信州吏毛遂病爲劉醫誤用藥致死忽復活曰是那个郎中主張劉方喜以爲已功應曰是我毛曰今後須仔細我病本不至死爲汝以藥殺我我今只在鬼門關候汝耳言訖而死劉亦繼歿此醫生稱郎中之明証也夷堅志又云張二大夫者京師醫家後徙臨安官至翰林醫官人仍稱爲張二大夫則北方醫生之稱大夫亦起於宋矣又按唐時醫生亦稱待詔

張祐有病宮人詩云藥餌無徵待詔愁此正醫卜待詔翰林之本稱也

又按大夫本秦漢時士人之通稱漢書高祖紀呂公從沛令沛中豪傑吏聞令有重客皆往賀蕭何爲主吏令諸大夫曰進不滿千錢坐之堂下按沛中豪傑吏蓋不過鄉豪及健吏之類而通謂之大夫蓋秦制賜民爵有大夫官大夫公大夫五大夫七大夫諸稱漢書註五大夫第九爵也七大夫第七爵也大夫第五爵也度其時民之有此爵者人卽以其爵呼之相沿日久遂以爲尊奉之呼故鄉豪及健吏皆得稱耳漢書高祖詔曰七大夫以上皆高爵也久立吏前曾

不爲決甚無謂也異日秦民爵公大夫以上令丞與充禮今吾於爵非輕也又可見當時爵雖大夫而以事至官吏前仍循部民之制

大人

大人之見於經書者周易大人與天地合其德陸德明釋文引王肅云聖人在位之目以及孟子大人者不失其赤子之心莊子大人者聖人不足以當之之類皆以德位兼言惟論語畏大人孟子說大人則藐之則以勢分而言又左傳閔子馬曰夫人必是說而後及其大人郝黑肱以濫來犇君子曰艱難其身以險危大人註皆言在位者然此特泛論有位之人非覲面尊奉之呼也

司馬相如大人賦則更以稱天子而其時公卿大臣無
大人之稱可知其呼爲大人者則以施于父母伯叔如
家語曾子曰參得罪大人又史記范蠡之長子曰家有
長子今弟有罪而大人不遣是吾不肖也漢高祖云始
大人以臣爲無賴霍去病云不早自知爲大人遺體南
史王僧儒幼時有人以冬李餽其父先以一與之僧孺
辭曰大人未見不容先嘗北史田式以事下獄欲自盡
其子信勸之曰大人朝廷重臣又無大過何至于此唐
書裴彙云大人病痛若此摭言楊國忠子應試學問荒
陋禮部侍郎達奚珣畏國忠使其子撫先白國忠曰大
人白相公郎君所試不中程式然亦未敢黜落五代史

王珂妻本李克用女珂被梁圍急使妻致克用書曰賊
勢如此大人忍不救耶宋史蔡京子攸入謁握父手曰
大人脉勢舒緩體中得無不適又隱逸傳南安翁以長
子被拘于官欲請官代長子杖小兒曰大人豈可受杖
兒當代此皆以呼其父也漢書疏受叩頭曰從大人議
此以呼其叔也張博詐淮陽王欲上書爲大人乞骸骨
去後漢書范滂曰惟大人割不忍之恩此皆以呼其母
也柳宗元稱劉禹錫之母云無辭以白其大人亦謂禹
錫之母是大人之稱止以稱父母伯叔從未有以之稱
尊官者考唐宋以來仕宦相呼蔽以下或稱字尊長稱
丈公卿貴官則稱其官位宋天聖中詔文武官不得過

稱官品諸節度使觀察使未至太傅者許稱太傅防禦使至橫行使許稱太保諸司使許稱司徒皆本等檢校所應帶之官也又洪容齋記李德裕自崖州與某侍郎書云崖州司戶叅軍李德裕狀侍郎十九弟及李文定稱王沂公云樞密太師相公之類是皆以官位相呼無所謂大人者戴埴鼠璞云四明有大人堂本錢億曾爲此州節度後其姪惟治復來節度因創爲祠名曰大人堂蓋大人之稱乃子弟稱父兄之詞而俗訛以爲闕相公廟誤矣梁溪漫志及莊綽雞肋編亦謂世惟子稱父爲大人若施之於他則衆駭笑之矣可見宋時猶以大人稱父母而不加之達官貴人也元人高則誠琵琶記

蔡狀元呼黃門爲大人則元時達官已有大人之稱明尹直嘗齋瑣碎錄吳與弼以處士徵至京每見士大夫皆稱大人又湧幢小品徐晞以吏員起仕至尚書歸郡守率諸生迎之諸生以其非文學出身頗偃蹇晞出一對曰劈破石榴紅門中許多酸子諸生不能對晞爲對曰咬開銀杏白衣裏一個大人王弇州觚不觚錄三司見督撫稱老先生見巡按稱先生大人此又前明以大人爲貴官之稱也按後漢書鄧禹傳禹孫康以鄧太后臨朝遂謝病不朝太后使內侍者問之時官人出入多能有所毀譽其中耆宿稱爲中大人所使者乃康家婢也亦自通中大人康詎曰汝我家出亦敢爾耶又陽球

傳球小妻程璜之女璜方用事宮中所謂程大人也蔡邕諫靈帝疏亦云乳母趙婕讒諛驕溢門吏霍玉依阻爲奸今道路紛紛復云有程大人者察其風聲將爲國患據此則東漢時已有大人之稱蓋本宮闈近侍之人身無官位而勢居顯要故以大人稱之其後遂爲近侍尊稱如晉書劉聰時中宮僕射郭猗欲王皮劉惇二人證成皇太弟劉乂謀逆之事以計脅之皮惇大懼皆曰謹奉大人教此又近侍稱大人之明証也琵琶記黃門稱大人黃門亦近侍也惟近侍稱大人因而後世相沿京朝官亦稱之如徐晞以尚書稱大人也京朝官稱大人因而京官出使於外者亦皆以大人稱之如巡按稱

先生大人是也因而遂爲貴官之隆稱於是督撫亦稱之此又近日京官外官位高者皆稱大人之所自也

按諸史所載亦有以官位而稱大人者後漢書岑彭傳韓歆南陽大人註謂大家豪右也唐書郭子儀應回紇大人之占段秀實傳田少榮稱秀實爲仁信大人高駉傳女巫王奉仙謂畢師鐸曰揚州災當有大入死是古來原有貴官稱大人之例據雞肋編所云則南宋時尚專屬子之稱父而不以稱貴官則唐以前稱貴官爲大人者乃從旁指目之詞而非覲面相呼也覲面稱大人則始於元明耳

顯考

祭法王立七廟曰考廟則父也曰王考廟則祖也曰皇考廟則曾祖也曰顯考廟則高祖也檀弓殷主綴重注始死未作主先以木爲重至虞乃作主殷人作主後則聯其重縣諸死者之廟去顯考乃埋之疏顯考高祖也世世遞遷至爲顯考其重猶在離顯考乃埋之是古人皆以高祖爲顯考也其稱父亦曰皇考皇者大也於君上之義無涉曲禮父曰皇考母曰皇妣離騷朕皇考曰伯庸晉司馬機爲燕王告祔廟文亦曰敢昭告於皇考清惠亭侯是也徐健菴讀禮通考謂今人以顯考爲父則起於有元之世時以皇字爲君上尊稱遂易爲顯考然葉石林云漢議宣帝父稱羣臣初請諡爲悼太子魏

相以爲宜尊稱曰皇考自是皇考遂爲尊號之稱非後世所得通用石林之言如此則似宋時已無稱父爲皇考之例矣健菴之說不知何所本

孤哀子

今人父亡稱孤子母亡稱哀子按古禮父母喪皆稱哀子如雜記云祭稱孝子孝孫喪稱哀子哀孫孔疏曰祭謂卒哭以後之吉祭喪謂虞以前之凶祭又儀禮筮宅之辭曰哀子某爲其父某甫筮宅又曰哀子某來日卜葬其父某甫是哀子之稱不特爲母亡也孟子幼而無父曰孤故父喪亦稱孤子如稽康與山巨源絕交書少加孤露又趙彥深見母自陳幼小孤露此皆以無父言

然雜記諸侯之禮他國弔含祔皆對曰孤某須矣曲禮諸侯在喪曰適子孤左傳列國有凶稱孤在喪也有凶也皆通乎父母之喪言之非專係乎父也宋書巴陵王休若傳謝沈居母喪被起聲樂酣飲不異吉人並不知沈居喪迨自稱孤子衆乃駭愕袁粲傳粲丁母憂桂陽王休範爲逆粲扶曳入殿慷慨謂諸將曰孤子受先帝顧託本以死報今日當與褚護軍同死社稷是母喪亦稱孤子矣六朝人每言偏孤如梁書韋叟傳父義正早卒叟少而偏孤事母以孝聞北史皇甫和十一而孤母夏侯氏親授以經書此則其父先亡者也梁書裴子野生而偏孤爲祖母所養魏書裴延儻少偏孤事後母以

孝聞北史刁冲年十三而孤祖母高氏哀之撫養尤篤此則其母先亡者也謝貞傳貞以母憂毀瘠將歿謂姚察曰孤子釁禍所集將隨灰壤時貞父已先亡此則父母俱亡者也可見孤字之義本無定屬董禕又引鄭氏禮注三十以內未有室而無父母者謂之孤子當室如禮所云父母存衣冠不純素孤子當室衣冠不純采是也今世以孤屬父以哀屬母者實本於司馬溫公書儀而朱子亦是之或問朱子孤哀二字之義朱子曰溫公亦只據今俗不欲父母混并之也且從之亦無害是孤哀分屬父母在宋世已然又按開元禮四品以下卜宅兆泣卜者命曰孤子某云云注曰今儀父及祖稱孤子

孤孫母及祖母稱哀子哀孫則孤哀之分稱實始於唐
又不自溫公始蓋自唐以來已相沿成俗而溫公仍之
耳又宋政和禮虞祭至大小祥祭祝文父曰孤子母曰
哀子則亦不獨載之溫公書儀也

下官

戲本凡官員自稱皆曰下官漢書賈誼傳大臣罷軟不
勝任者曰下官不職下官二字始此然非官員之自稱
也其以之自稱高江村天祿識餘謂始於梁武帝改稱
臣爲下官按此說非也南史劉穆之傳宋以前郡縣爲
封國者諸王所封之國其內史相並於國主稱臣去任使止孝建
中乃創制稱爲下官宋書武帝孝建二年定制諸王封

國者二十四條內一條凡封內官止稱下官不得稱臣
罷官則不復追敘通典及龔熙正續釋常談皆引之然
晉書成帝時庾亮欲廢王導與郗鑒書公與下官並荷
托付大姦不掃何以見先帝於地下晉載記靳準對劉
粲曰下官急欲有所言安帝時劉敬宣答諸葛長民書
曰下官常慮福過災生王誕說盧循曰下官與劉鎮軍
情味不淺王鎮惡乘利趨潼關乏食欲還沈林子怒曰
下官授命不顧今日之事當爲將軍辦之則晉時已有
此稱蓋晉時仕宦者皆自稱下官惟王國之僚屬見其
王則稱臣至宋則并令王國之僚屬見王亦稱下官耳
宋史洪湛傳羣臣請建儲太宗曰若立太子則東宮僚屬皆須稱臣形跡之間易生搖惑然則宋時東宮官見太子已稱臣矣他如宋文帝

使沈慶之領隊防劉湛謂曰卿在省歲久比當相論慶之正色曰下官在省十年自應得轉又慶之與蕭斌議兵事曰衆人雖知古今不如下官耳學也元顥藉梁兵破洛陽自立沛郡王欣欲附之崔光韶曰元顥引寇兵覆中國豈惟大王所宜切齒下官亦未敢仰從曹景宗醉後對梁武帝誤稱下官帝大笑此皆六朝時仕宦稱下官之故事也又按五代史補宋彥筠謂李知損曰衆人何爲號足下爲羅隱對曰下官平素好爲詩其格致大抵如羅隱故耳然則五代時尚相沿有此稱也今仕途中不復稱下官凡知府自稱卑府府以下皆稱卑職按程棨三柳軒雜識淳熙間高曇進對上稱其不爲高

談梁相戲云高曇不爲高談以何對周益公對云卑牧且爲卑牧謂武臣見知州自稱卑牧也則屬吏之以卑自稱自宋已然

小生晚生

漢書朱雲傳雲罷官過薛宣宣曰君且留我東閣可以觀四方奇士雲曰小生乃欲相吏耶師古註小生謂宣新學後進乃欲以我爲吏乎小生之名始見此然非自稱作謙辭也其以之自稱者唐李陽冰自稱其篆書謂斯翁之後直至小生斯翁謂李斯也又元稹上令狐相公曰白居易易能詩或爲千言或爲五百言律詩以相投寄小生自審不能有以過之往往戲排舊韻別創新調名爲次韻

此文士自稱小生之始也宋晦翁和劉秀野詩有小生
自愧衰頹早之句則二字并入之詩矣又晚生二字按
晉書戴淵傳淵弟邈請立學校疏曰今後進晚生目不
覩揖讓之儀隋書薛濬寄弟模書曰吾幼丁艱酷晚生
早孤不聞詩禮是晚生二字晉以來已有之但以之自
稱不知起於何時知新錄云嘉靖丙戌刑部趙公乃費
閣老同年每投謁必書年晚生屠應峻曰趙老真神童
或問其故曰費鵝湖二十作狀元年最少今渠稱晚生
非神童而何此近代稱晚生之見於記載者也

老先生

先生本古者父兄師長之通稱然古人有單稱生或單

稱先者史記蘇秦被刺死齊王求其賊誅之燕人曰甚
矣齊之爲蘇生報讐也註生一作先言先生也叔孫通
諸弟子以制禮皆賜爲郎喜曰叔孫生誠聖人也弟子
稱師曰生亦謂先生也漢書貢禹傳禹請老元帝報曰
朕以生有伯夷之廉史魚之直故親近生今未得久聞
生之奇論也師古曰生謂先生也時禹年八十餘元帝
敬之稱生非輕之乃尊之也此單稱生也史記鼂錯傳
學申商刑名於軹張恢先所徐廣曰先卽先生漢書梅
福曰叔孫先非不忠也註先猶言先生也又建元中上
招賢良公卿曰鄧先好奇計註亦曰鄧先猶云鄧先生
也此單稱先者也王新城謂明朝中官稱士大夫曰老

先本此衛宏漢官舊儀博士稱先生博士師也此又後
代師稱先生之始也至老先生之稱見漢書賈誼傳諸
老先生未能言誼盡爲之對然第謂諸儒之老者耳非
覲而尊奉之呼也至宋始有此稱劉元城語錄凡引司
馬溫公則不著姓名必曰老先生劉過上周益公詩云
昌黎前進士司馬老先生蓋用此故事又鐵圍山叢談
鄭尚明昂老先生也後世京朝官稱老先生蓋始此然
宋史王黼諂事梁師成呼爲恩府先生趙范致書丞相
史彌遠亦但稱先生范上彌遠書曰天下之人無不知李全欲反雖先生亦知其必反時彌遠當國權位最重而范稱之曰先生又吳曦降金楊巨源圖興復謂安丙曰非先生不足以主此事非巨源不足以了此事則宋時老先生之名尚非
仕途常稱元人程鉅夫集有送學舟老先生詩疑此稱

起於元初王弁洲觚不觚錄三司見督撫稱老先生見
巡按稱先生大人則前明老先生之稱猶未濫及王新
戚香祖筆記謂京官舊例各衙門稱謂有一定如翰詹
稱老先生吏部稱逸君印君科稱掌科道稱道長是也
自康熙丙子以後則各部司及中行評博無不稱老先
生矣此又近日京官通稱老先生之故事也

官人

奴僕稱主及尊長呼卑幼皆曰某官人亦有所本杜田
杜詩博議官人乃隋唐間語北史梁彥光傳初齊亡後
訴訟官人于變萬端舊唐書高祖紀官人百姓賜爵一
級武宗紀中書奏赴選官人多京債御覽文士傳棘嵩

見陸雲作逸民賦嵩以爲丈夫出身不爲孝子則爲忠臣必欲建功立策爲國宰輔遂作官人賦以反之此官人之見於史傳者然唐以前必有官者方稱官人昌黎集王適墓誌銘云一女憐之必嫁官人不以與凡子是也至宋則已爲時俗通稱宋史岳雲傳雲年十二卽從張憲戰多得其力軍中呼爲羸官人夷堅志易官人及第條有報榜者至逆旅曰此店有易官人及第又陸氏負約一條陸氏再醮後獨步廳事有急是來稱鄭官人有書鄭乃其前夫也張次山妻一條次山喪妻後入京參選偶游相國寺與亡妾遇驚問之妾曰現服事媽媽在城西一空宅官人可以明日飯後來相會此又可見官人之稱在宋時已爲常談也明制郡王府自鎮國將軍而下稱呼止曰官人然官人之稱已遍於士庶固不僅王府支屬矣

官

世俗以行相呼曰幾官此亦最古梁書武陵王紀聞湘東王繹將討侯景謂僚佐曰七官文士豈能匡濟後紀爲繹兵所敗繹將樊猛入其舟紀曰願送我見七官唐摭言李舟與齊映友善映爲將相舟以書與之猶曰寸二官足下

爺

爺本呼父之稱說文云吳人呼父爲爺是也今不特呼

父凡奴僕之稱主及僚屬之呼上官皆用之宋書王彧子絢六歲讀論語郁郁乎文哉外祖何尙之戲曰可改耶耶乎文哉以郁乃其父嫌名也南史侯景既僭位王偉勸立七廟并請七世諱景曰前世吾不復記惟阿爺名標是六朝人但以爺呼父也今通用爲尊貴之稱蓋起於唐世按通鑑高力士承恩久中外畏之太子亦呼爲兄諸王諸公呼爲翁駙馬輩直呼爲爺新唐書爺作爺曰直呼爲爺可見從前但以呼父未有以呼貴官者自此以後遂相沿爲尊貴之稱今世俗所稱王爺公爺老爺所自來矣木蘭詩不聞爺孃喚女聲杜詩見爺仰面啼爺孃妻子走相送此爺字之入詩者

爹

莊綽雞肋編云今人呼父爲爹母爲媽兄爲哥舉世皆然問其義則無說爹字雖見於南史梁始興王憺刺荆州還民歌之曰始興王人之爹赴急如水火何時來哺乳我荆楚方言謂父爲爹乃徒我切又與今世俗所呼之音不同也云云然戴埴鼠璞已辨之謂爹字原有兩音按廣韻陟斜切羌呼父也徒可切北方人呼父也隋書回紇傳以父爲多唐書回紇阿啜可汗亦呼其大相頡干迦斯曰兒愚幼惟仰食於阿多國政不敢與也則亦與徒可切之音相近矣又韓昌黎祭女文亦有阿爹阿八之稱宋人小說記顯仁太后自金回值壽節高宗

極天下之養用宣和故事以龍涎沉腦屑灌燭內列十數枝白太后曰此燭頗愜聖意否太后曰爾每夜常設數百枝上私謂憲后曰如何比得爹爹富貴仇遠禪史錢良臣自諱其名其子讀書凡遇良臣字皆令避之一日讀孟子今之所謂良臣古之所謂民賊也亦改云今之所謂爹爹古之所謂民賊也聞者大笑

家祖家父家君家兄舍弟家姑家姊

賓退錄云今南北風俗稱其祖及父母莫不加以家字按後漢書王丹傳大司徒侯霸欲與丹交遣子昱候於道曰家公欲與結交列女傳馬融女嫁袁隗隗譏融有貧名妻曰孔子不免武叔之毀家君獲此故其宜爾顏

之惟家訓云昔侯霸之子孫稱其祖曰家公陳思王稱

其父曰家父母曰家母潘尼稱其祖曰家祖則家祖家

父家母之稱由來久矣魏略文帝嘗言家兄孝廉自其

分也家兄謂舍弟晉載記苻堅時慕容泓起兵與堅書曰資備

大駕奉送家兄皇帝家兄謂慕容暉也北史楊津傳津事兄椿極

敬人有就津求官者津曰此事須家兄裁之陽俊之自

言有文集十卷家兄謂陽休之亦不知吾才士也梁元帝攻蕭

詧詧曰家兄謂其兄譽為釋所改無辜屢被攻圍七父若顧親恩豈

應若是此家兄之稱之見於史傳者也又魏文帝謝鍾

繇見與玉珙書曰是以令舍弟子建因荀仲茂從容喻

鄙旨又世說戴安道高隱而其兄欲立功業謝太傅曰

卿兄弟志業何其大殊戴曰下官不堪其憂家弟不改其樂南史齊東昏賜蕭懿死懿臨歿謂使者曰家弟在雍深為朝廷憂之家弟謂梁武帝時為雍州刺史唐書柳公權為侍書學士其兄公綽與宰相李宗閔書曰家弟本志儒學以侍書見用頗類工祝願徒散秩此舍弟家弟之見於史傳者也顏之推又云姑姊妹已嫁則以夫氏稱之在室則以次第稱之言禮成他族不得稱家也子孫不得稱家者輕略之也然蔡邕書文稱姑姊曰家姑家姊北史高道穆為京邑出遇魏帝姊壽陽公主不避道道穆令卒棒破其車公主泣訴帝帝他日見道穆曰家姊行路相犯深以為愧則家姑家姊之稱亦有自來矣今俗惟子孫

不稱家其猶顏氏之遺訓歟褚河南帖稱其姪曰家姪

堂兄弟

俗以同祀之兄弟為堂兄弟按禮經曰從兄弟無堂兄弟之稱也其稱蓋起於晉時晉書司隸荀愷有從兄喪自表赴哀詔未下而愷造太傅楊駿第傅咸因劾奏愷曰死喪之威兄弟孔懷同堂方隕輒行造謁急諂媚之敬無友于之情同堂之見於史者始此南史劉暄傳徐世檟曰明帝是武帝同堂尚加減害後魏書公孫獻封氏之甥其從兄遂李氏之甥地望懸隔祖季珍曰士大夫須好姻親二公孫同堂兄弟耳吉凶會集便有士庶之別元顥入洛廣陵王遙欣集眾議曰北海長樂俱是

同堂兄弟今欲何向北齊書孝昭帝謂趙郡王叡曰須
拔是我同堂弟舊唐書中宗卽位以堂兄千里爲成紀
郡王又李師道伏誅其堂弟師賢等並流張獻誠請老
薦其堂弟獻恭自代徐堅傳詔書有與逆黨同堂親不
得任京官柳漁傳臣堂伯祖爽與褚遂良等同被譴戮
則更有堂伯祖之稱矣唐書韋縉傳有議堂姨舅服制
一疏又有堂舅堂姨堂甥之名

尊老尊兄令弟

杭州人自稱其父曰尊老徽州人自稱其兄嫂曰尊兄
尊嫂他處則稱人之父曰尊公尊老稱人之兄嫂曰尊
兄尊嫂按晉書載記劉淵謂傅祗之子暢曰尊公雖不

達天命然各忠其主南史何子平之母年未及終養而
籍註有誤年例已滿子平卽便去官顧愷之謂曰尊上
年實未八十親故所知何卽辭祿吉玠之父犯重罪玠
乞代父死蔡法度誘之曰上知尊侯無罪行當自釋北
史楊播與北海王詳議論不屈詳顧播姪昱曰尊伯姓
剛不服理唐書李林甫恐嚴挺之大用乃謂其弟損之
曰上待尊兄意甚厚盍爲見上策此皆稱人之父母伯
叔爲尊而非以自稱其父母伯叔也然以之自稱亦有
所本何子平爲揚州從事月俸得白米輒易粟麥人曰
所利無幾何足爲煩子平曰尊老在東不辦得米何心
獨享白粲是自稱其父曰尊老也三國志註袁術與袁

紹書曰神應有徵當在尊兄北齊書後主緯居南宮其弟琅琊王儼從上皇胡后居北宮嘗於南宮見新冰早李還怒曰尊兄已有我何竟無後儼殺和士開後主緯使人召儼儼曰尊兄若欲殺臣臣不敢逃罪此自稱其兄曰尊兄也隋煬帝將卽位先縊死其兄勇乃卽位曰令兄之弟果堪大任此又自稱其兄曰令兄也謝靈運與惠連弟詩云末路值令弟酬問開心顏杜工部詩令弟草中來倉然請論事是又自稱其弟曰令弟也

丈人

王充論衡人形一丈正也故名男子爲丈夫尊公嫗爲丈人也至壻呼婦翁曰丈人不知起於何時吳曾能改

齊漫錄謂本於史記匈奴謂漢天子我丈人行也然史記注丈人尊長之稱非必專以之指婦翁也論語子路遇丈人莊子子貢遇灌園丈人戰國策秦王謂唐睢曰丈人芒然而來嚴遂奉百金於聶政曰爲丈人粗糲之資史記荆軻傳高漸離家丈人召使前擊筑灌嬰聞魏勃本教齊王反責之勃曰失火之家豈暇先言丈人而後救火乎宋書袁熙爲彭城王義康說范蔚宗曰小人請以七尺之軀立功事成歸諸吾子丈人何如孔熙先亦以語激蔚宗曰丈人若謂朝廷相待厚者何故不與丈人爲婚南史張充與王儉書曰所可推襟送抱者惟丈人而已唐書元載擅權時有丈人從載求官載度其

人不足任事但贈河北一書文人不悅及往謁節度使
大獲過望杜甫贈韋濟詩文人試靜聽是皆尊者通稱
耳三國志獻帝舅車騎將軍董承句裴松之註云靈帝
母董太后之姪於獻帝爲丈人古無丈人之稱故曰舅
也此則雖非妻父然以舅爲丈人則裴松之時已有是
稱而妻父曰外舅則以外舅爲丈人蓋亦卽起於是時
耳莊綽雞肋編引柳子厚稱妻父楊詹爲丈人以爲後
世呼妻父爲丈人之始然南史齊東昏呼潘妃父寶慶
爲阿丈唐書杜黃裳之壻韋執誼爲相黃裳勸其請太
子監國執誼曰丈人甫得一官奈何啓口議禁中事是
六朝及唐已有是稱宋史張永德乃郭威壻威起兵常

遇謂永德曰君視丈人事得成否此又近代婦翁稱丈
人之故事也蓋唐以前凡尊長及婦翁皆曰丈人後遂
專以屬之婦翁耳今人呼婦翁爲丈人而稱交游中尊
者亦尙曰某丈想六朝及唐亦如此也至婦翁曰岳丈
曰泰山其說尤紛紛不一或曰晉樂廣爲衛玠妻父岳
丈蓋樂丈之訛也釋常談則曰因泰山有丈人峯故也
按泰山有丈人峯而玉置經青城山黃帝亦封爲五岳
丈人則山之稱丈人者不一世俗以婦翁有丈人之稱
而丈人又有山岳之典遂引以爲美稱耳晁氏客語引
開元十三年封禪泰山三公以下例遷一階張說爲封
禪使其壻鄭鑑自九品至五品會大宴明皇訝之黃幡

綽曰泰山之力也

宋人樞常談引此以為稱丈人為泰山之始

然則唐時并已有泰

山及岳丈之稱矣又黃譜筆記謂漢郊祀志大山川有

嶽山小山川有嶽壻山嶽而有壻則嶽可以呼婦翁矣

世俗之稱未必不因此又因山嶽而轉為泰山耳此雖

近附會亦可備一解

通鑑唐僖宗避黃巢出奔至壻水詔成都備巡幸

舅

舅之稱有三爾雅母之舅弟為舅秦風所謂我送舅氏是也妻父曰外舅孟子註謂我舅者吾謂之甥是也夫之父曰舅禮記所謂舅姑爾雅所謂姑舅在則稱君舅君姑沒則曰先舅先姑是也後人呼妻兄弟曰舅本非古法爾雅謂妻之昆弟為甥劉熙釋名謂之外甥是今

之所謂舅正古之所謂甥乃俗呼正相反蓋妻之昆弟方謂我之子為甥而我呼妻之兄弟亦為甥本無差別故從乎已之子之稱以尊之耳新唐書朱延壽傳延壽為楊行密妻弟行密以其私附朱全忠乃誑其妻曰吾喪明諸子幼得舅來代我無憂矣及至乃殺之通鑑則云軍府事當悉授三舅胡三省註云延壽第三呼妻之兄弟為舅始見於此則五代時已有此稱也

內兄弟

儀禮姑之子稱外兄弟舅之子稱內兄弟閭若璩云今人稱妻弟為內弟非也從史記當稱妻弟從漢書當稱婦弟云云然顏真卿家廟碑銘云祖昭甫工書與內弟

殷仲容齊名父惟貞少孤育於舅仲容氏蒙教筆法是仲容乃昭甫之妻弟也而云內弟則妻弟之稱內弟自唐已然

親家翁

輟耕錄云男女姻家相呼曰親家翁此三字見唐書蕭瑀傳瑀嘗因宴太宗語羣臣曰自知一座最貴者先把酒羣臣相顧未言瑀引手取杯帝問何說曰臣是梁朝兒隋室皇后弟唐朝天子親家翁又唐明皇女新昌公主下嫁蕭嵩子衡嵩妻入謁帝呼爲親家母是也然隋書煬帝令宇文述之子士及尙公主呼述爲親家翁述治李渾獄成帝曰吾宗社幾覆賴親家翁而獲全則隋

時已有此稱又後漢書禮儀志上陵之儀百官四姓親家婦女咸列註凡與先后有瓜葛者曰親家是親家二字本起於漢也五代史李愚代馮道爲相而惡道每指其所失謂劉昫曰此公親家翁所爲蓋昫乃道之親家也蘇氏閒談錄馮道與趙鳳同在中書鳳女適道仲子以飲食不中爲道妻譴罵鳳令婢訴道凡數百言道不答及去但云傳語親家翁今日好雪此亦親家翁之見於記載者呂藍衍言鱗謂親家翁親字讀作去聲自五代時已然然亦不始於五代盧綸作王駙馬花燭詩云人主人臣是親家則唐已作去聲矣

郎君大相公

吳斗南云漢制二千石以上得任其子爲郎故謂人之子弟爲郎又其時稱相國爲相君尚書令中書令爲令君使者曰使君太守曰府君故謂郎亦曰郎君云云是郎君之稱其原皆出漢任子也漢以後則凡身事其父者皆呼其子爲郎君而郎君遂爲貴介及裙屐少年之美稱至唐又爲極尊貴之稱并有加之帝王大臣者後漢書西南夷傳越雋太守張翁卒安帝以其有遺愛乃拜其子湍爲太守夷人歡欣奉迎曰郎君儀貌類我府君魏書甄琛好弈碁通夜不止令奴秉燭或時睡輒加杖奴曰郎君辭父母仕宦京師若爲讀書執燭奴不敢辭罪乃以圍碁日夜不息豈向京之意而賜加杖罰不

亦非理南史齊晉安王子懋爲明帝所害子昭基以二寸絹爲書參問消息故吏僧慧見之曰此郎君書也一勳而卒張冲爲梁武帝所圍臨歿囑其子元嗣固守及力屈將降故吏房長瑜曰前使君忠貫日月郎君但當端坐畫一以荷祈禱唐明皇欲立忠王璵爲太子而李林甫勸立壽王上猶豫不決忽忽不樂高力士請其故上曰汝揣我何意力士曰得非以郎君未定耶但推長而立之復誰敢爭史思明嘗爲裴寬裨將後據東都訪得其子諤呼爲郎君後唐莊宗爲晉王時令其子繼岌爲張承業舞承業以帶馬爲贈曰郎君纏頭皆出承業俸祿梁敬翔謂末帝曰臣事先帝三十餘年今雖爲相

實朱氏老奴耳事陛下如郎君徐溫徙治昇州使養子
 知誥為潤州團練使知誥不樂宋齊邱曰三郎驕縱溫親子知
訓也留揚州輔政敗在旦夕潤州去廣陵一水耳此天授也又吳
 王之弟歷陽公濛以國政盡歸徐氏心不平念周本乃
 吳之勳舊遂往投之本將出見其子宏祚固諫本怒曰
 我家郎君來何為不使我見此皆身事其父而呼幼主
 之稱也周瑜稱周郎何晏稱粉郎何郎潘岳稱潘郎檀
 郎江斲稱江郎謝道韞稱其夫王凝之為玉郎王僧辨
 稱鮑泉為玉郎隋滕王瓚尚周武帝妹順陽公主美姿
 容時人稱曰楊三郎此皆少年之美稱六朝以來王公
 之子弟皆稱之晉書桓元傳元興中有童謠云長干巷

巷長干今年殺郎君後年斬諸桓已而會稽王之世子
 元顯果為元所害是也至唐而郎之稱益尊張易之兄
 弟舉朝稱為五郎六郎安祿山呼李林甫為十郎劉駱
 谷自京來安祿山必問十郎何言宦官李輔國用事宦
 者不敢呼其官皆謂之五郎甚至裴坦之子勛呼其父
 為十一郎何后呼元宗為三郎韋堅唱得寶歌亦有三
 郎當殿坐之語優人黃幡綽對元宗并稱三郎郎當代
 宗罷李輔國中書令輔國憤之謝曰老奴事郎君不了
 而郎之稱直加於帝王矣至如李義山見棄於令狐楚
 而有詩曰郎君官貴施行馬東閣無因得再窺楚乃令狐綯相國之子也
 朱滔遣人說田悅曰日者八郎有急滔與趙王來救今

願八郎治兵與滔共取大梁王武俊亦稱田悅為八郎
 朱全忠取河中王珂而縛出降全忠止之曰太師舅之
 恩何敢忘謂珂之父若郎君如此使僕何以見舅於地王重榮也
 此又皆貴人子弟之通稱也又唐人稱新進士亦曰郎
 君撫言薛逢晚年厄於宦途嘗策贏赴朝值新進士榜
 下綴行而出前導人謂逢曰迴避新郎君是也又後唐
 莊宗既被害弟存霸奔投李彥超軍士欲殺之彥超曰
 六相公來當奏取進止又明宗子從榮年少驕狠或勸
 之曰河南相公有老成之風相公宜自策勵勿令聲聞
 出河南之下河南謂其弟從厚也潞王從珂拒命閔帝
 使安彥威張虔釗等討之從珂在城上自訴從先帝百

戰得天下今何罪而受誅聞者哀之楊思權因大呼曰
 大相公吾主也遂率諸兵降從珂此又稱幼主為相公
 之見於書傳者也蓋時俗之美稱雖其始本不甚尊往
 往漸加之於極貴及相呼既久則又為通稱如宋時猶
 稱宰相為相公今則下賤者亦稱相公矣

哥

哥字廣韻云今呼為兄韻會亦云今人以配姊字為兄
 弟之稱是哥之為兄其來久矣然舊唐書王琚傳元宗
 泣曰四哥仁孝同氣惟有太平四哥謂睿宗也元宗又元
 宗子棣王琰傳惟三哥辨其無罪三哥謂元宗也是以
 哥呼其父矣顧寧人以為君父之尊而呼之曰哥名之

不正莫此爲甚然古人稱哥原有數種漢武故事西王
母授武帝五嶽真形圖帝拜受畢王母命侍者四非答
哥哥此以之稱帝王者也唐元宗與寧王憲書稱大哥
及同玉真公主過大哥園池此稱其兄者也晉王存勗
呼張承業爲七哥又三司使孔謙兄事伶人景進呼爲
八哥此亦稱兄長者也王荆公與其子雱評論天下人
物屈指謂雱曰大哥自是一箇大哥卽謂雱趙善湘臨歿顧其
長子嶷曰汝官不過監司太守語次子范曰汝開闢恐
無結果三哥甚有福但不可作宰相耳三哥謂第
三子葵此父之
稱其子者也蓋古人又以哥爲郎君之稱雖宮闈之間
亦然晉王存勗命其子繼岌爲張承業起葬指錢積謂

承業曰和哥乏錢宜與一積周太祖子青哥意哥皆爲
漢所誅周世宗長子曰宜哥俱見五代史歐陽公名其
子曰僧哥見稗史陸放翁之伯小名馬哥見老學庵筆
記又韓魏公君臣相遇傳英宗卽位光獻太后心不悅
一日謂韓琦曰昨夢這孩兒坐慶寧宮大哥乘龍上天
去大哥謂英宗子神宗也又顯仁太后自金將歸欽宗
卧其車前曰傳語九哥吾南歸但爲太乙宮使足矣他
無所望於九哥也九哥謂高宗則兄之稱其弟也葉紹
翁四朝聞見錄高宗已命高士儂尙柔福帝姬及顯仁
太后歸謂高宗曰哥被番人笑說錯買了顏巷帝姬呼
高宗爲哥則母之稱其子也又高宗禪位後遊大滌山

有陸凝之獻詩高宗曰布衣入翰林可也歸當語大哥
行之大哥謂孝宗也則亦父之稱其子也又前明泰昌
升選閣臣劉一燝等請熹宗既出李選侍猶呼哥兒卻
還者三可見宮庭中呼太子諸王皆曰哥乃親貴之稱
想唐時已如此然則顧寧人之議毋亦狃於吳中習俗
而不知哥字之本有是異稱也

以哥字爲稱者蓋古來選宗室諸王皆呼哥兒
如文宗公孫氏呼哥兒也宋明宗呼哥兒也
上自天子下至士大夫皆呼哥兒也
大抵古稱宗室子弟曰哥兒其正外夷則呼公孫氏
亦謂曰哥兒也蓋古與一語同太師呼哥兒也

